

樵

山

詩

集

惠

隱



著者三十五歲象



著者五十四歲象

弁言

集十餘年所有。大加芟削。存八十首。付之梓人。棄弗錄者殆過半矣。夫生當今日而言詩。猶印度人談佛經。涅槃縱證。將何補於亡。然既上不能爲國効勞。下不能爲民請命。傷憤愴感。發爲無聊之詩歌。以稍舒其鬱抑。只令人悲。增忉怛耳。嗟夫。生不逢盛明。得以歌舞昇平。潤色文物。獨愁苦悶疾。爲是哀怨之音。予豈好爲是哀怨之音哉。辛亥四月西樵山人潘敬識。

樵山詩集

樵山詩集

南海潘 敬惠隱著

雜詩十五首

書生不讀書。酒徒不飲酒。孰能識此意。亦知世無有。歧路何茫茫。寸心向誰
剖。今日且如此。違言百年後。儒冠供溲溺。文章任覆瓿。身不滿七尺。誰信
膽如斗。燕趙多豪士。紛紛事屠狗。得爲豪士屠。狗當死不朽。

志士自鞭影。何如鞭其身。鞭影不覺痛。鞭身留鞭痕。一事作不成。百鞭徒酸
辛。鞭身亦何益。顧影獨愴神。我行影亦動。我詈影無言。日日我鞭爾。不聞
爾呼冤。此影若太息。使我心更煩。路窮莫可達。志屈莫可伸。爾影真不幸。
隨我遭我嗔。我今揮鞭來。欺爾不能奔。鞭之復鞭之。徒揚地上塵。



我生何所嗜。飲酒及鼾睡。方得一日醒。便作十日醉。日日自消磨。刀刃不成銳。傳聞燕王臺。上有黃金餌。黃金一旦盡。國士遭捐棄。多少智勇人。乃爲黃金累。誓將舍彼去。獨幹乃公事。徒手無黃金。所願終不遂。歲月空蹉跎。一掬英雄淚。

漸離善擊筑。激越多幽思。不能令人樂。祇能令人悲。此音久不作。獨有祖龍知。知音乃讎敵。遭遇亦已奇。如何奮一扑。頂踵隨捐糜。悲哉廣陵散。亦有終絕時。調絕豈足惜。心堅不可移。壯士去無還。抱筑將安之。聽者輒墮淚。雖善亦胡爲。

丈夫貴剛烈。豪氣吞九州。李耳不曉事。著書獨尙柔。遂令數千年。觸目多楚囚。奄奄偷一息。徒遺男子羞。我慕朱郭俠。一怒威王侯。囊橐何所有。纍纍

讎家頭。快人幹快事。安用效浮邱。拔劍出里門。來作燕趙遊。千年豫讓橋。蕭蕭夾松楸。老馬頓足鳴。此恨成悠悠。人生不得志。天地一贅疣。既學賈人賈。還從謳者謳。囚首談詩書。已矣先生休。

志願苦無盡。歲月悲有窮。羲和太匆急。駕行鞭六龍。何不減其五。一龍行天空。緩轡待夸父。策杖相追從。我當惜寸陰。力爭造化功。身外皆勁敵。轉戰圍萬重。取勝在一着。陷陣衝前鋒。橫俯長江水。獨上太華峯。古人不可作。後人來無蹤。此任果誰屬。屬之虬髯公。叱日使倒行。驅之返於東。英雄不失時。失時非英雄。

畫龍不點睛。深恐破壁飛。所愛在一壁。長使龍受羈。一夕雷雨作。無目焉能爲。天龍彷彿降。俯視爲歎歎。畫師惡作劇。騰拏終無時。全身缺一點。乃不

如蛟螭。雖非池中物。終是壁上皮。龍亦學乞憐。泥首求畫師。欲點點不得。
壁破身成糜。

佛法大無畏。落地拔孽根。衆生尙同樂。大地惟一春。浩浩東海水。潛伏萬龍
鱗。皎皎中宵月。不着一纖塵。我體有寂滅。斯人無等倫。托鉢西方來。佛能
識迷津。下乘說因果。造化如轉輪。上乘在涅槃。無果亦無因。今我一粒粟。
化作百金身。具此大願力。拯彼久沉淪。獅子怒吼威。羣象紛然馴。

入世不得意。何如作狂生。禮法棄弗道。放浪因忘形。啜糟終日醉。不忍我獨
醒。有時發狂歌。慷慨聊抒情。滿胸塞奇氣。突兀殊難平。奇氣山嶽重。肉體
鴻毛輕。持此時不遇。四顧久屏營。志願有萬種。事業無一成。欲草狂生傳。
往乞文字靈。窮途忽一慟。千里如聞聲。哀哉阮步兵。以哭傳其名。

志士重實行。著書乃無聊。浩氣衝霄漢。秦火安能燒。蔡邕作古琴。可惜琴尾焦。一日蔡邕死。焦尾先不調。區區身後名。棄置任寂寥。勒石燕然山。石崩名亦銷。持此一卷書。讀之腹爲枵。衆草嗟同焚。誰暇辨蘭椒。乃知金石音。不如里巷謠。

古人夢不覺。長夜今漫漫。對酒獨慷慨。愁緒來無端。不知天地窄。焉知天地寬。老僧說經典。點頭石愈頑。手把龍文劍。尙有血爛斑。裝以七寶匣。獻之太子丹。此劍若入秦。一去將不還。縱能化龍飛。難渡咸陽關。可惜於期頭。千年血未乾。此恨飲難盡。惻愴摧心肝。蕭蕭易水流。獨爲荆軻寒。

鬱鬱長松長。森森古柏古。我欲呼古人。久立以延佇。遺世事獨行。一行無處所。小隱復大隱。山林亦囹圄。誰云慷慨士。難免一坯土。欲渡苦無梁。欲飛

又無羽。孤憤滿胸臆。可飲不可茹。嚼彼蓮實甘。即知蓮心苦。攬鏡窺頭顱。誓當不負汝。壯心有幾寸。熱血灑何許。時刻欲語君。畏人不敢語。

季布大任俠。屈作朱家奴。英雄遇末路。所走惟一途。此途果爲何。乃爲亡命徒。俠氣尙閃爍。森森豎虬鬚。白晝入燕市。萬錢擲樽蒲。古風久衰歇。壯士安在乎。軹里日蕭蕭。夷門草半枯。快劍不時鳴。欲舞無與俱。灑盡滿腔血。負此七尺軀。有酒君莫沽。有狗君莫屠。舉座請君歌。放眼忽狂呼。膽小若鼯鼠。一生不丈夫。

在昔獨行客。高潔比幽蘭。孤芳不自賞。寂寞埋草間。牛羊日夕至。一旦同摧殘。空擅幽逸品。能耐霜雪寒。不爲秋菊英。供彼騷人餐。不爲古松柏。年年守空山。獨與賤種伍。大智若冥頑。蘭兮果有知。自處當不凡。鋤去惡草根。

毋許侵吾藩。

勸君莫作詩。作詩病喪心。幽思日盤踞。格格肺腑深。文字構大獄。一網哀東林。春風變秋氣。絲竹成哀音。楚騷一靈鬼。到處相追尋。入水數千年。精氣歸消沉。不過大耳兒。朝夕梁父吟。孤桐一何孤。恐爲風霜侵。

狂生行

狂生雖狂狂不死。我獨呼生作狂鬼。豈無詩狂及酒狂。世間狂生那有此。我與狂生談九州。眼底縱橫百萬里。狂生一哭我一笑。如此江山收入瞳子裏。江山滿地皆榛棘。刺目出血不能視。我與狂生遊。大索長安市。夷門今日已崩圯。千古英雄睡不起。剩有狂生獨抱屠龍技。吁嗟狂生狂生慎勿喜。人生有如逐獵耳。讀書何用讀經史。一劍寒芒報知己。落落肝膽真壯士。流芳遺臭何足云。

身沒無名實所恥。狂生負奇氣。狂歌良有以。茫茫哭前途。滔滔悲逝水。頭顱空有千金價。時哉不遇長已矣。丈夫流血不流淚。我爲龍頭孰龍尾。天下紛紛從此始。關中豪傑化螻蟻。老蛟作怒入海底。狂生斬之飲其髓。拔劍喝斷水倒流。昂然獨立何奇偉。崑崙奴。紅拂妓。斑白虬髯倏變紫。海外扶餘究誰是。王氣銷沉三百年。褐裘何來太原美。伏波馬革換蘆席。豎子珍珠讒薏苡。狂生太息獨拊髀。我今老大安所恃。不願田間負耒耜。不屑侯門躐珠履。箕踞偃蹇太無禮。折腰辱煞五斗米。伏櫪雄心猶未止。若逢穆滿即駮駟。雲夢之隈。湘水之涘。芳草千年紉蘭芷。高風冥冥不可企。懷石自沉屈子愚。投書作弔賈生鄙。狂生意氣人中豪。儼如天外九峯峙。白眼羞與絳灌比。崢嶸頭角知何似。南陽人物紛臧否。塚中枯骨乃掛齒。元龍高臥復爾爾。百尺危樓餘廢址。衆生

蠢蠢如鹿豕。孰能參透清淨理。中原馳驅一馬箠。淘盡元氣留渣滓。男兒生不成名死當葬戰壘。戰士痛哭爲我誅。孤墳寂寞生荆杞。乃公不受賢良祀。君不見案頭一卷龍沙紀。滾滾英雄成事能有幾。獨有蓋棺事則已。狂生眞箇奇男子。

留別羊城諸子四首

極目中原總棘榛。排雲如見九華門。江山忍惹英雄淚。天地驚塗戰血痕。獨有司勳同落魄。更無楚客與招魂。長安此去八千里。我欲乘風叩帝闈。半是驚皇半是疑。不堪海外版圖非。紛紛戰國爭兵日。滾滾諸公入夢時。曹社可憐新鬼語。伊川防有婦人悲。明庭抗議徒多事。慚愧江南一布衣。元二凶災信有無。銅人猶認血模糊。南朝不國原非主。北地誰玉願作奴。宣室

有靈思變法。漢家得計揖強胡。男兒事業蒼茫甚。回首雲山應笑吾。
象郡榛蕪正苦兵。無端別夢墮孤城。一篇南浦銷魂賦。三疊陽關煞尾聲。何日
釣竿尋舊隱。諸君罇酒話平生。臨涯揮手從茲遠。江水深深送客情。

流花橋懷古

流花橋上清明節。流花橋下啼鶻血。但流花片不流愁。朝怨春風夕秋月。秋月
無端夢渺茫。春風一夜百花香。素馨斜瘞宮人恨。桃葉渡流春水長。不盡離情
攬飛絮。橋邊錯認紅棉樹。樹樹年年剩落花。花落水流不知處。漢王當日情何
癡。千金鑿通昆明池。池波蕩得白雲絲。流出宮中紅葉詩。錦繡河山作兒戲。
付與花流送將去。却憐燕瘦比環肥。三十六宮媚豬媚。茉莉花開夜氣濃。等閒
花月笑春風。隔水盈盈玉人至。此橋乃與銀河通。壁作闌千金作砌。憑軒醉舞

腰肢細。翠鈿陰纏續命絲。瓊枝春綰同心髻。嶺南亦有阿房宮。臙脂染出溪水紅。溪水一朝化爲血。碧海青天恨不絕。豈有西施浣茜紗。更無仙女飯胡麻。一代豪華倏坏土。十里橋流十里花。我來踏青問遺蹟。野鳥不啼春寂寂。無賴東風掃落英。殘紅散盡餘寒碧。蔓草荒烟春復秋。淒涼誰與話風流。祇今嗚咽橋頭水。似訴南朝一段愁。

從軍樂七首

其一

人云從軍苦。我云從軍樂。男兒生世間。眼底卑山嶽。殺賊真快事。腰間劍騰躍。堂堂七尺軀。崢嶸峙頭角。莫作尺蠖屈。當爲巨獅搏。卻敵飛將軍。臨戎老經略。縛倒郵支頸。踏破谷蠡幕。不見刀頭脫。但見賊頭落。壯膽大如斗。

俯仰不慚怍。無寧死戰爭。流血染沙漠。安能死貧賤。委尸填溝壑。苟生非英雄。英雄如霜鏑。可磨不可折。脫鞘奮一斫。

其二

聞道遼海西。動地鳴鼓鼙。匈奴驅兵至。殺人如犬鷄。邊吏急告警。羽書星夜馳。將軍開幕府。凜凜天王旗。募集敢死士。運策勝六奇。誰是愛國者。奮身投王師。時危識豪傑。世亂重健兒。朔方好身手。俠氣滿鬚眉。登高忽四顧。立馬聲一嘶。我慕班定遠。擲筆留餘威。馳驅使絕域。風生四馬蹄。百萬雄軍中。博得一鐵衣。少年盛意氣。勢欲吞虹霓。朝謁魏虬帥。暮辭糟糠妻。去家莫言苦。壯行莫言歸。丈夫恥雌伏。乘時事雄飛。振翮橫四海。不愁遠別離。

其三

長嘯出門去。去去大凌河。河深不見底。萬馬頃刻過。回首望故里。忽在天之涯。一片古戰場。霜高木不華。古來多壯士。俠骨埋山坡。戰血漬白草。邊風飛黃沙。劈面峙雄關。挿天高巍峨。檄告鷄林兵。大帥征么麼。上馬披鎧甲。下馬枕雕戈。頭戴鷓尾冠。脚穿虎皮鞞。縱轡馳敵營。快劍試新磨。衆賊皆羅拜。歡呼千歲爺。狐鼠紛投竄。龍虎紛跳拏。不啻單于庭。不啻將軍家。前有霍驃姚。後有馬伏波。始知天漢威。豪傑如星羅。橫覽英雄傳。慷慨一何多。歸來作軍樂。豪氣激銅琶。方揮得勝檄。莫唱浪死歌。今我不殺賊。此行將爲何。

其四

軍中忽傳令。歡呼若雷轟。大帥今誓師。諸將驚爲神。嗟惟爾衆士。饒勇誇絕

倫。磨刀復磨刀。有我無強鄰。四海驟騰沸。天地飛胡塵。遂令乾淨土。化爲蠻觸爭。但逐蠅頭利。何恤牛耳盟。太平豈是夢。戰勝即太平。文明本無種。戰勝即文明。鎗林彈雨中。萬死求一生。觸耳氣勃發。鞞鞞鼓鼙聲。風雲歸叱咤。宇宙任縱橫。呼起擒虎將。橫掃蚩尤兵。隻手萬人敵。一顧三軍驚。揚我祖國光。戰死有餘榮。嗟惟爾衆士。堂堂軍國民。經盡百爭戰。甘盡萬苦辛。毋使軍不軍。愧煞人非人。

其五

我聞赤壁戰。午夜用火攻。周郎精音律。一曲滿江紅。我聞沉鐵鎖。險哉混江龍。不見石頭城。飛渡來艤舫。我聞決絳水。灌入晉陽宮。居民化魚鼈。軍士爲沙蟲。我聞渤海外。戰雲黑萬重。可憐屯軍港。遂以丸泥封。挺身戰艦上。

鼓浪當敵衝。波濤翻海立。砲轟兩耳聾。河伯氣一噴。水勢來洶洶。能令方寸心。化爲萬夫雄。不跨大宛馬。不張繁弱弓。不持太阿劍。不仗力士鋒。勝敗一瞬間。都在烟焰中。射彈密如雨。妙手不空空。老蛟海底伏。漫天來黑風。百戰餘殘生。海上猶臨戎。不知誰氏子。奮臂奪元功。

其六

山嶽倏震動。場場如有聲。戰場判曲直。火器今無情。一鼓作士氣。膽重身爲輕。躍馬入重圍。殺賊不轉睛。血濺大刀頭。刺鼻有餘腥。略得尺寸土。便築受降城。索虜驚膽落。草木皆疑兵。割取萬首級。博我一英名。併力衝前鋒。破敵焚其營。勸君莫畏死。畏死不得生。

其七

丈夫誓殉國。雄心長不死。點點沙場血。灑落青史裏。成敗安足論。一蹶輒復起。落落此肝膽。飛躍九萬里。怒壓天外雲。喝倒東流水。胡兒見我來。駭愕疾相視。敢把虎鬚捋。咄彼小螻蟻。乃公手一劍。勳業從茲始。我爲飛將軍。我爲鐵漢子。赫赫萬古名。攫之在戰壘。

送邵大令從恩東渡四首

側身東海隔漫漫。醉眼摩挲把劍看。萬里江山淘浪盡。一天風雨逗秋寒。由來佳士謀身拙。如此英才入世難。長嘯掉頭東去也。送君匹馬出長安。神州之外更神州。濯足扶桑萬里流。佛偈料能求梵典。寶刀記取買吳鉤。投身絕域作龍尾。一顧中原失虎頭。島國若逢長劍俠。不妨同約采真遊。斷流此去三千里。兩地相望一萬重。大陸殺機埋瘴馬。新洲王氣走羣龍。海中

欲訪虬髯客。域外曾無羊鼻公。西望崑崙猶在目。登高憑弔問真雄。
策杖登臨日本橋。風吹詩思倍飄飄。下關水急爭奔海。明石江空怒起潮。誰信
書生多本色。是真名士太無聊。歸來贈我東遊錄。豪氣遙知定未消。

送瑞安陳介石先生南旋八首

即今何處是天涯。一別寒雲萬里遮。魑魅驚看文吐燄。夢魂孤負筆生花。先生蒙文

嫌字之名轟都下爭知我。賦到江南便是家。立馬長呼歸去也。莫令秋思感年華。

故山隱隱水迢迢。紫氣盤旋尙未銷。兩載春風今寂寞。先生主大學史千年青史

也蕭條。不得先生以發揮之故傳來妙語捫碑讀。著就新書付火燒。代抱不平騷客怨。聲

聲惟有浙江潮。

容易神州變陸沉。薊門北望陣雲深。蕭條魂夢愁終古。搖落江山悲到今。文字有靈應慟哭。琴絃失譜不成音。壯心未許消磨盡。寶劍宵宵伴客吟。

松杏山頭戰鼓聲。蓼蓼猶似報昇平。英雄能賦空橫槊。天地無心亦厭兵。憑眺中原惟極目。側身東海每傷情。先生一去真無那。留得人間記姓名。

燕市馳驅獨據鞍。舊時豪俠久摧殘。雄談落落驚人易。風骨稜稜入世難。放眼未曾逢壯士。折腰安肯爲微官。歸途重過荆卿處。風不蕭蕭水不寒。

兀立隄崙一丈夫。而今失意臥江湖。歌成愛國情常熱。說到和戎淚亦枯。耐冷松林霜節勁。感秋桐樹素心孤。諸公日作太平夢。猶憶陰山鐵騎無。

蕭疎兩鬢拂風塵。好箇莊嚴自在身。剩有名山伴歌哭。那堪滄海嘆沉淪。九流混混橫千古。萬象森森共一春。回首故園搖落甚。漫天風雨正愁人。

送客城頭暮角哀。江山蕭瑟獨登臺。更誰幽意紉芳草。獨有寒香吐老梅。大地如今滿荆棘。極天何日起風雷。橫流此去滄洲晚。攬轡澄清心未灰。

送陳政宣酒

湖山之亭發新醅。山色湖光落酒盃。知君亦有劉伶癖。一罇贈君醉寒梅。寒梅冬夜暗香發。興來獨酌梅花窟。梅花伴君臥白雲。政宣自號臥雲山人君折梅花笑明月。明月從來戀酒家。照君舉爵酌梅花。梅花明月供清詠。酒酣落筆驅龍蛇。

盧生祠

巢父許由薄天子。不應掬流洗其耳。有心自炫便沽名。千古引爲隱士恥。邯鄲當日說盧生。黃粱夢熟殊詭異。四十年來宰相業。此夢無乃徒多事。至今嘖嘖稱風流。道旁廟食期千秋。我來摩挲斷碑碣。呼起盧生從之遊。左携呂翁枕。

右拍盧生肩。沉沉睡倒壺中天。繁華歡樂皆幻境。側身人海何茫然。醒來頓足發長嘯。盧生不禁啞然笑。我且勸子勿復爾。夜深與子談玄妙。噫嘻乎悲哉。人生作事無一可。盧生盧生真欺我。爾以世間富貴如浮雲。胡爲乎享受萬家之香火。

重九感懷四首

振衣獨上大孤峯。禾黍迷離望故宮。匝地戰雲遼海黑。漫天烽火九州紅。關中豪傑推劉季。江左興亡屬謝公。菊酒滿斟拌一醉。醒來何處訪眞雄。

重陽風雨慣蕭蕭。指點寒城入望遙。故國江山空有夢。新亭風物總無聊。誰云繭殼絲難盡。縱有琴材尾亦焦。莫話舊時亡國恨。狂生塊壘恐難消。

鬼謀曹社聽模糊。神賜虢邦信有無。起陸殺機爭累黍。中原王氣久榛蕪。請看

浩劫橫金翅。欲把災祥問赤烏。歲歲重陽君記取。亂離何地插茱萸。
萬斛塵襟客裏身。江湖搔首嘆沉淪。小邱低聳諸峯笑。老佛無言衆象馴。絕好
韶光應有價。欲談風月更無因。憂時長比黃花瘦。愧煞河山袖手人。

偶書

撐胸塊壘更誰知。自笑疏狂還自疑。儘有華年驚噩夢。何曾優詔訪明夷。醉耽
麴蘖誰中聖。焚却詩書便不癡。似此幽情消未得。一燈痛讀楚騷詞。

胡子賢吉夕詩調之

艷福君修到。仙居第一樓。有才宜得婦。無意覓封侯。吉夕今連璧。神州久缺
甌。未償如海願。慚愧馬周頭。

天下數誰健。君誠游俠徒。激昂披肺腑。顧盼掉頭顱。我愛趙元叔。人稱晏大

夫。君身材短小衆生本骨肉。豈獨庇妻孥。

撐腹經綸在。才高倚馬奇。惜無明主顧。幸有美人知。慰藉憑紅粉。殷懃學畫眉。匈奴正滿塞。何以有家爲。

半壁山河異。滄溟失巨鰲。安危爭此日。歡樂豈吾曹。流水盪紅葉。春風醉碧桃。人家作快婿。意氣未應豪。

紀事四首

神柱嵯峨插碧霄。東來間氣未全銷。已無隙地容三晉。賴有長江護六朝。使節請纓羈屬國。平章決策費還遼。和戎畢竟孤臣恨。白馬河聲咽怒潮。

西域盡知天漢富。金繪百萬海填平。叢中投餌鷹難飽。門裏張羅雀亦驚。絕妙和親操勝算。敢從獻納辨虛名。昨朝有令行新法。只鑄金錢不鑄兵。

兵氣消磨元氣殘。血腥風緊逼人寒。一絲弱髮牽身動。半局枯碁着手難。俠客
髭鬚今磔戟。英雄髀肉久離鞍。版圖指點傷心處。病眼朦朧不忍看。

莽莽神州易陸沉。首陽北望怕登臨。那堪芳草春前意。併入孤桐秋後心。憑弔
故宮餘廢址。欲哀亡國不成音。勸君莫作等閒看。一寸河山萬寸金。辛企弓說
金主君王

莫聽捐燕計一
寸河山一寸金

明十三陵

落日蒼涼哭鬼雄。淫昏神武一爐中。帝王屢禩餘坏土。翁仲千年守殯宮。豐草
迷離嘶牧馬。亂山蜿蜒鬱蟠龍。我來獨灑思陵淚。困死潢池恨不窮。

慈禧后萬壽

瑤池王母稱多壽。下界東方樂有生。仙藥可偷兔亦死。王孫盡啄燕無情。龍涎

至寶行將降。佛骨能靈豈待迎。秦岱今朝呼萬歲。如何四海不聞聲。

今別離

朝應軍門召。暮與鄉井別。老妻典裙釵。爲我買巾幘。呼童治鷄黍。盤殮羅滿席。勸我獲落杯。飲我稻梁液。今日款語親。明日關山隔。綢繆須臾間。贈言鏤金石。妾生非男兒。恨不即束髮。辛苦總隨君。隨君到回鶻。疇昔有木蘭。英雄出巾幘。拋却一孔鍼。換來七寸鐵。飲馬瀚海水。臥席天山雪。堂堂女丈夫。肝腸至今熱。君行舍妾去。生死何消說。生當衣錦歸。死當魂不滅。賤妾誓殉夫。願君誓殉國。努力自珍重。莫望故鄉月。

感事六首

躑躅天涯畫角催。悲歌貸酒賦歸來。此身剩有一腔血。極目惟餘歷劫灰。滿郡

妖氛烏啄屋。萬方多難客登臺。憂時漸覺腰肢瘦。更聽松山風雨哀。

側身悵望赫連城。未讀兵書曷請纓。馬到沙場如舊識。劍逢風雨輒長鳴。秦中有策爭西幸。遼左無軍奉北征。比歲頻聞哀痛詔。道旁築室幾時成。

陪京王氣鬱漫漫。愁絕西風不忍看。司市已行新國寶。

新莽廢五銖錢更鑄國寶指俄羅斯之勒行盧布也

遺民猶望漢衣冠。五陵烽火驚先帝。三省蕭條泣百官。獨有銅駝偷墮淚。濯龍門外晚霜寒。

滿地繁霜一雁聲。五更寒角迫孤城。將軍失計甘從賊。父老何辜久苦兵。豈有上書憂故國。更無前席問蒼生。蕭蕭山海關頭月。照見匈奴夜斫營。

山川蟠踞如龍虎。付與旁人作舞臺。失地豈關全局計。和戎終賴不凡才。血腥萬里黎民哭。卵累中原胡羯來。長灑書生孤憤淚。江湖一隊已心灰。

醉倒能傾萬斛愁。狂生一哭動神州。聲聲鐵笛關山月。點點蘆花天地秋。身世儘堪供作客。頭顱誰信可封侯。男兒志願休孤負。滄海茫茫不盡流。

偶感三首

一代清流思孟博。三年碧血灑萑宏。閉關大索飛緹騎。投獄含冤對簿丞。逆賊本應長桎梏。通臣猶復夢觚稜。沉沉芳草千年恨。擬喚靈均恐不膺。詔書詔仆黨人碑。九死餘生一俠兒。自有聖明求駿骨。不應謠詠嫉蛾眉。行吟憔悴當憐我。獨立蒼茫更語誰。瓜蔓抄抄名士盡。那堪重讀七哀詩。

小照自題

肝膽照不見。鏡裏祇頭顱。君貌豈殊衆。君心雄萬夫。少年好游俠。劍氣吞三吳。腰掛讎人頭。血滴衣裳濡。狂歌走燕市。擊碎玉唾壺。誓殺赤眉賊。封侯

剖銅符。數奇難得偶。壯膽空滿軀。朝典千金裘。夕傾十斛珠。豪遊供一擲。
咄咄爾何愚。欒布困傭保。要離隱屠沽。丈夫若遇時。中原爭馳驅。魯連蹈東
海。阮籍哭窮途。丈夫不遇時。煙波一釣徒。兀兀崑崙山。泱泱洞庭湖。湖山
兩不惡。浪走禿眉鬚。側身天地間。躑躅瞿然呼。白眼睨餘子。紛紛似螻蛄。
平生尙意氣。俗鬼來挪揄。傲岸已如此。慷慨胡爲乎。倩彼丹青手。畫作俠士
圖。怒目一相視。大笑呼狂奴。

除夕四首

萬事倏除盡。留者惟雄心。雄心除不得。躍動殊難任。乃知無形物。脫却寒暑
侵。鬚髮頃刻改。歲月去駸駸。雄心無轉移。誓不隨光陰。飛躍衝九天。一昇
永不沉。誰是知心人。請來聽琴音。琴音有時寂。此心何處尋。

歲首志千里。歲暮亦千里。千里復千里。行行何時止。老驥貴在骨。安可計馬齒。遇合會有時。不營千金市。我有流年約。獨立無所倚。約在此夕終。即在此夕始。依人乃成名。碌碌非志士。

爆竹破我夢。起坐歌無聊。肝膽忽跳動。中心似然燒。掣出此肝膽。借彼濁酒澆。滿腔塞塊壘。格格不能消。塊壘果何物。形狀難具描。詩書百無用。愈讀腹愈枵。飲藥痛漁洗。病根拔幾條。我腹類爆竹。炸裂身爲焦。檢視破腹中。熱血猶湧潮。

寒暑若盜賊。剝奪人心力。乃公獨頑梗。挺身與之敵。經年戰場中。搏擊到今夕。精神重抖擻。相持無時息。立足苦不穩。刻刻恐辟易。志士惜分陰。駿馬馳八極。冬寒古柏綠。霜雪飽經歷。池中有怪物。時見鱗爪迹。騰拏不到海。

尾擊水盡赤。對此長歔歔。天晴無霹靂。英雄不遇時。局促爲形役。

放歌行送程君臻

程君江西人。有古燕趙風。顧盼露俠氣。目中無英雄。有時向我談世局。江山收入方寸中。酒酣痛哭復大笑。舉國呼君爲迂公。君年未二十。來作京兆遊。雄心飛躍九霄外。是迂非迂非人儔。三年溷迹長安市。訪遍屠沽無壯士。古風消歇數千年。夷門侯生呼不起。程君拊髀獨太息。萬里不遇一知己。歷劫豈堪重回首。我爲蒼生來到此。敝車馳逐帝京塵。辱煞江湖自在身。上書慷慨論變法。鬪強不畏丞相嗔。載寶南宮滔。懷印朱買臣。諸公酣睡夢富貴。焉辨鳳毛與龍鱗。治安三策棄不用。狂生失意多酸辛。多酸辛。蘇季子。一冬敝却黑貂裘。剩有無價屠龍技。此間何足留。行將入海求瀛洲。相逢或有長劍俠。助我

斫斷滄海流。揖別京華裏。袖出言志詩。君留詩三百字掉頭一去八千里。丈夫何用愁別離。烏鵲啄屋見前兆。龍蛇起陸含殺機。宗周岌岌若累卵。世無鬼谷誰先知。我聞東方有神聖。一字堪足爲吾師。衆生仗我大願力。今我不學將胡爲。知君攬轡心良苦。滿腔熱血灑如雨。稽生佯狂無人識。長卿多病向誰語。知君儻當世才。擲筆封侯念未灰。何日捐軀能報國。即今搔首獨登臺。碧眼胡。赤眉賊。生來便嗜殺。祝君成名時。胡賊兩喪魄。男兒各抱經世志。健者豈獨虬髯客。君不見燕雲割去十六州。胡塵撲上曲江樓。遺民一日盡左衽。誰能奮臂捉索頭。又不見淮南嘯盜多如毛。白晝劫人腰插刀。黃巾黑山豈有種。狐鳴篝火皆人豪。我今酣歌君起舞。相將隻手擎天柱。慟哭羞隨阮步兵。憂時空有陳同甫。竭來倚柱愁無端。朔風蠻雨襲人寒。漫天烽火從征苦。滿地荆榛行路難。

。憶昔讀書太學舍。與君促膝西窗夜。講學精神貫古今。縱談時刻憂天下。拔劍聊爲王郎歌。使酒偶作灌夫罵。今年一別東海濱。眼中人化夢中人。東海春水深且闊。灑向大地清妖氛。吁嗟乎。妖氛不清將奈何。此生憂患何其多。請君努力挽天河。請君奮起揮日戈。君兮君兮毋蹉跎。

揚子江口

萬里凌風欲步虛。扁舟去國野踟躕。江山衰廢猶如畫。文教消沉尙有書。慢道海門能作險。即今天塹了無餘。乘桴我亦懷深意。畢竟鴟夷勝子胥。

題拿破崙象

流得如渠血。羸來蓋世名。兵戈一閃爍。魑魅亦嗚鳴。山嶽拔仍在。乾坤鑄不成。可憐荒島上。髀肉感重生。

過波闌故都

無限興亡感。江山喚不靈。驅車過故址。憑軾爲傷情。俯仰爭奴主。升沉判死生。如何金粉地。長築受降城。

薪膽同堪苦。國殤應有魂。遺民懷伏臘。野鬼哭忠墳。嗚咽長流水。模糊舊戰痕。無情芳草綠。獨占古城春。

莫斯科

萬里河山壯。奔騰繞故宮。霸圖方失鹿。日俄戰後王氣尙如龍。地據秦關險。人稱北鄙雄。百年蠶食計。噓起大王風。

口占

回首中原獨有情。衆生如醉喚難醒。琵琶胡語由來慣。底事鯁生抱不平。

有述

欲求博學通重譯。每爲探奇愛壯遊。書比神丹堪換骨。花如美酒儘消愁。青山向我多青眼。白日催人易白頭。對客尊前談勝事。風濤陡起繞身流。

畢業返國感賦

學得屠龍技。無龍空爾爲。祇思天上有。莫訝世間稀。即事已如此。前程安可知。美人望不見。枉自說佳期。

樵山詩集

三四

弁言

- 一、前八十首爲三十歲前所作。後爲三十一歲至五十六歲所作。
- 一、用自訂之韻。詳樵山續著中。視沈約韻書。蔑如也。
- 一、散見於樵山雜著及續著諸詩。兩書中已言明不收入集之故。
- 一、將來得詩成帙。續刊新集。固所願也。倘篇什無多。祇好納諸續作筆記中。

民國二十七年八月西樵山人潘敬識

樵山詩集

樵山詩集

南海潘 敬惠隱著

山海關

劈面秦關百二雄。江山回首霸圖空。中原景象成爭鹿。遼海風雲起蟄龍。慢道安危三箭定。似聞消息一丸封。孤城歷盡滄桑感。留得當年戰血紅。

遼瀋道中

百戰河山眼底收。天生松杏作鴻溝。興亡往事成陳迹。形勝中原占上游。無限淒涼思故國。莫教容易失神州。蕭蕭胡馬紛悲嘯。日落荒城起暮愁。

國慶日四首

不國猶相慶。浮名足自娛。亂離惟強酒。孤憤欲焚書。幾輩危巢燕。吾儕洪水

魚。愁腸偏向熱。搔首野踟躕。

歌罷愁看劍。寒鏃不可彈。即今無介子。何日斬樓蘭。未到宗周隕。依然滿座歡。興亡誰有責。努力且加餐。

六街笙管動。景象恰昇平。拌此一朝醉。譬如今日生。無端感搖落。有夢想澄清。莫道風雲惡。將軍樂不成。

斗大黃金印。難酬不世功。攀龍多跣跡。屠狗亦英雄。薄俗思馮異。蒼生望謝公。諸君慢擊柱。何策可平戎。

咏紙鳶

青雲雖得路。素願本相違。却被微絲縛。終難萬里飛。因風聊奮翮。隨地可忘機。博得兒童樂。盤旋舞落暉。

枯樹

達人貴大觀。榮枯安足論。造化有代謝。豈能長年春。茲樹得解脫。樸素還其真。既免匠石視。復無鳥雀喧。如何宋庾徒。搖落悲酸辛。所見曷不廣。未死先招魂。豈知一木微。亦有至理存。通塞各有命。天道妙無言。

元年入都作

萬象森羅絳闕深。西山王氣忽銷沉。銅駝隱約前朝淚。鐵騎縱橫萬里心。寒角聲中悲躑躅。劫灰堆裏悵登臨。京塵重憶渾如夢。極目蕭條百感侵。

沉沉二百餘年痛。畢竟消磨一瞬間。且喜驅車過禁苑。

稱共和後衆所
獲得者僅此

可曾杯酒醉煤

山。漢家復睹官儀盛。燕市今看壯士還。笑問故人東向望。有無紫氣滿函關。

登萬里長城

祖龍怒鞭石。竟築萬里城。城亦如其人。勢欲吞滄溟。我來跨城脊。目慌心爲驚。俯視傲山嶽。仰視驕日星。騰拏欲入海。吸水若長鯨。反身投絕漠。倒瀉若建瓴。壯哉我祖龍。氣魄今如生。二世隕國祚。萬世留國屏。嬴姓縱可易。秦城不可平。後繼有隋煬。運河力鑿成。輿地任剖割。山川爲易形。事業古無偶。但與祖龍爭。治水大禹蹟。滄桑多變更。開邊漢武功。戎狄屢背盟。獨有萬里城。亘古長崢嶸。大地作臥榻。一枕東西橫。

出都四章

獵獵秋風塞草肥。長安回首夢全非。山河浩劫傷華髮。憂患餘生感布衣。漢臘恐隨殘漏盡。國殤可有夜魂歸。伊川痛哭終無計。剩有西山任采薇。睥睨水殘山捲劫灰。悲歌躑躅一登臺。江關萬里蘭成老。烽火漫空冒頓來。欲向

衢中號雨雪。忽聞天外起風雷。渡江此日多名士。拌醉新亭濁酒杯。
狂生攬轡說澄清。失意聊爲萬里行。故國前途蕉鹿夢。神州到處鼓鼙聲。亂離
避地眞無術。太息蒼生久苦兵。身世崢嶸豪氣在。匣中長劍尙時鳴。
此去天涯淪落人。河山袖手問何因。眼中燕雀無完卵。味外鱸魚有好鱗。遍野
啼猿哀落木。極邊胡馬起征塵。更誰曉得漁翁意。不爲桃源爲避秦。

又四章疊前韻

十載腰圍不肯肥。中原愴感版圖非。嵯峨誤認標銅柱。慷慨無人問鐵衣。絕好
河山拌一擲。橫流滄海欲何歸。登臨極目增惆悵。日色荒寒照野薇。
一臥江湖心未灰。因風悵望李陵臺。欲從東海乘槎去。曾向長城飲馬來。
永日蟲鳴喧語夏。深宵蚊聚鬩成雷。相如得病難消渴。快著雄文快舉杯。

新遊居
庸闕歸

天末吹來海氣清。壓裝惟有短歌行。窮愁作客尊前醉。幽怨撩人笛裏聲。舊地重遊如有約。予再赴巴黎滄江老去不談兵。伯勞飛燕各殊意。分向東西振翼鳴。

秋風蕭瑟正愁人。慢向鰕生話夙因。似有鷄聲傷斷尾。何曾龍領敢批鱗。摧殘蘭蕙無芳草。拂拭衣襟有軟塵。愴出玉關吾去也。忍看鶉首欲歸秦。

滿洲里中俄交界處

入夜愁聞畫角聲。驅車重過受降城。雷池一自能飛步。遼海如今未解兵。依樣可憐秦塞月。幾曾照見漢家營。衝冠怒髮星星甚。滿地樓闌斬不成。

西伯利亞道中

莽莽荒原兩度過。嚇蠻豪氣久蹉跎。曉風殘月尋詩易。白雪黃沙壓鬢多。絕塞重來漿試飲。長城俯瞰劍新磨。強胡那識尊天漢。鐵騎縱橫可奈何。

被髮長行下大荒。人間天上兩茫茫。無邊積雪經年白。萬壘寒山入暮蒼。西域東來爭逐鹿。中原南望歎亡羊。鰥生此去懷孤憤。躑躅風塵太白傷。

題岳墓秦檜像

世俗誅奸佞。誅死不誅生。死檜骨已朽。誅之聊慰情。生檜柄國時。側目莫敢撓。鑄像日捶擊。徒聞金鐵鳴。

古檜史僅一。今檜乃千百。獻地甘媚外。擁兵專盜國。告爾誅檜者。滅此先朝食。若俟檜死時。誅之復奚益。

贈劍行

不讀任俠傳。不知太史書。丈夫手一劍。浪走遍江湖。江湖一走三萬里。白眼睨無餘子。逢君說劍燕市中。披瀝肝膽真壯士。君言愛劍如愛妻。朝起舞時

鷄亂啼。我言愛劍如愛命。能鍊精神能養性。爐火匪烈甲匪堅。金鐵匪剛石匪勁。問君去何處。告我將圖南。贈君青芙蓉。慷慨當釋驂。海風怒吼蛟螭泣。咄咄寒光迫人立。欲舞先愁收不得。星月慘黯關山黑。酣歌斫地若擊節。此行誓飲讎人血。血亦不可飲。劍亦不可磨。胸中塊壘何其多。祇今不見虬髯客。劍兮劍兮將奈何。

臥佛寺

我佛喜高臥。頽然若睡獅。吼聲久不作。起舞了無期。靜裏觀衆生。營營如醉癡。蝸角蚊睫中。萬千煩惱絲。何如證妙諦。稽首參牟尼。香國空色相。覺岸無險巖。我佛雖臥時。未來仍前知。爾衆雖醒時。蠢蠢皆行尸。委地倏物化。惻愴徒傷悲。

壽關吉甫父揆生先生

欲壽老人星。壽詩久不成。握管學吟詠。秋蟬樹間鳴。咳唾匪珠玉。慘淡費經營。腸不索即枯。觴不勸即傾。罍罇滿旨酒。縱吸如長鯨。瑤池桃正熟。瞻仰目爲瞪。竊念剖食之。可以解宿醒。高談忽驚座。箕踞竟忘形。老人含笑問。此客果何名。客奚有名者。燕市一狂生。

靜宜園

輦道東風照樣溫。不堪禾黍滿芳園。依稀似識宸遊處。寂寞惟餘野燒痕。閣內如今無帝子。路隅誰與泣王孫。上林春盡繁華歇。一任尋常鳥雀喧。築室居園中者極多

買山

入世從知出世難。縛身如繭一微官。買山始覺湖山好。避地方知天地寬。月色

無邊奚論價。泉聲滿壑自生寒。賦成招隱驚猿鶴。占得奇峯日夕看。

汨羅懷古

離騷痛讀楚江邊。漁父依然艤釣船。誰信蛾眉宜佩芷。不堪魚腹竟成筌。臨流欲問湘靈恨。弔古同傷賈傅年。千載端陽徒角黍。未將懷石起沉淵。

遊靈光香界諸寺

翠微何處是。幽賞境全非。柏老怒張蓋。荷殘怯卸衣。奇峯對我笑。涼月佇僧歸。登望香山頂。高冠綴碧暉。

宿靈光寺遇雨

襖被宿蕭寺。孤燈伴寂寥。雨聲驚冷夢。蟲響咽殘宵。虛室多生籟。奔湍欲變潮。明朝香界外。落葉擁山橋。

送客

送客江頭載酒行。臨涯小住話平生。君真浪走空皮骨。我獨悲歌寄性情。儘有才華能作賦。莫從離亂更談兵。不堪醉聽陽關曲。餘韻凄然繞古城。

和心畬邊警步原韻

幾見嚴關揖盜開。縱橫鐵騎羯胡來。將軍不作衝冠怒。我輩徒興累卵哀。自古朔方多虜患。如今中土少邊才。匈奴未滅休言隱。慷慨同登舞劍臺。

山居遣興

當暑年年賦遂初。半官半隱足軒渠。何山不納謝公屐。此室堪稱諸葛廬。雨到狂時如泛海。風當定處欲凌虛。會心景物皆知己。況有櫺頭萬卷書。無端學種故侯瓜。嫩綠盈畦怒吐芽。懶把文章驚海內。愛尋風味到田家。泉聲

遠送砧聲遠。日影斜拖樹影斜。回首中原正多事。撼天雷雨走龍蛇。
落落孤懷只自知。高山流水總相宜。非關門巧貪尋句。每爲憂時託詠詩。未許
名山僧占盡。不當皓月我來遲。林泉偶爾留踪跡。索米長安朔木饑。
且喜泉聲換市聲。任憑洗耳乞聰明。縱然佳士居城濁。不及鄉農得氣清。絕澗
斷雲龍起伏。深箐怪石虎縱橫。何當逕棄微官去。竹杖芒鞋快獨行。
草滿庭除綠不收。居然小隱詔風流。有花恒與月爭艷。無酒權將茗解愁。愛聽
黃鸝常早起。慣携縞鶴伴長遊。人生快事惟行樂。底事拘牽似楚囚。
避世何如到此間。忘機心共野鷗閒。身邊長物但奇石。眼底壯觀惟遠山。簇簇
野花蜂醉舞。沉沉烟樹鳥知還。有時待月携筇去。直到溪頭水半灣。
撲被幽居好寂寥。秋聲未到已蕭蕭。高歌不爲牢騷發。痛飲聊將塊壘消。林密

老籐盤石磴。雨餘殘葉擁溪橋。平生傲骨磷珣甚。獨向山靈一折腰。

誰說桃源不可望。白雲深處即仙鄉。心思得水增流動。學問因山變老蒼。天上無雙惟月色。人間第一是花香。疑是古句行吟竟夕尋佳句。搜出枯腸入錦囊。

朝風木葉落紛紛。散入池塘布錦紋。神朗有如潭底月。心閒常伴嶺頭雲。書來怕聽鷄蟲事。興到歡呼猿鶴羣。今世誰能拯饑溺。衆生終古自芸芸。

萬山如拱勢崔嵬。兀立峰頭眼界開。避世端從憂世起。樂天翻自怨天來。迎風最好披襟處。斫地權當舞劍臺。多少英豪草間活。大才難用令心哀。

偶成

新奇文字誇村話。迂腐儒冠困典墳。冷眼旁觀惟一笑。涇清渭濁兩難分。

村翁

坐樹優悠每終日。自然習靜羨村翁。木鷄修得幾生到。爐火純無百鍊工。流水行雲共晨夕。伯勞飛燕任西東。個中妙理都參透。老拙生來色相空。

春草

有約東風拂面溫。一朝嫩綠滿郊原。依依乍醒池塘夢。點點猶留野燒痕。蝶影迷離翻曲徑。馬蹄雜遝入孤村。春來生意欣無限。去日榮枯且慢論。

秋日登陶然亭

日午層城獨放歌。劍華未許盡消磨。江亭弔古殘碑在。秋意侵人落葉多。青草白楊新培塿。綠烟紅雨舊山河。無花誰說整如錦。極目蕭條感逝波。

稷園牡丹歌

我非富貴場中人。胡爲效顰歌牡丹。村夫入城睜怪眼。紅嚼春風聊解饑。佳種

向推崇效寺。百年老幹多娟媚。地僻遠在城南隅。欣賞苦難日夕至。稷園後起
花事繁。棠梨桃杏爭春暄。方見籐籬雜生樹。更喜牡丹開滿園。姚黃魏紫何芬
馥。間以粉紅兼黛綠。小如茗盞大如盤。朱如丹砂白如玉。五色纍纍珠貫顆。
一園千花萬花朵。捧心西子霧鬢鬆。出浴楊妃雲髻禪。妙香聞得令心清。佳處
由來不易名。燭光午夜微傷艷。月色黃昏又覺輕。士女尋芳勞玉趾。靚粧欲與
花爭美。妬者羨者各有情。花本忘憂並忘喜。黽飀鋪地錦繽紛。書生對此不嫌
貧。侯門曩日深如海。流出民間遍地春。四時行樂從春始。况值花開香十里。
人中之王一旦休。花中之王長不死。最好名葩數雒陽。不堪零落苑臺荒。彩雲
散後歸何處。野草青青獨自芳。

賀梁保三重游泮水

方今裸遊時。如何尙遊泮。一遊復重遊。乃至遊無算。此遊彼亦遊。兩遊分冰炭。彼遊絕羞恥。腥膻滿江漢。豺虎作前驅。骨肉交相叛。公不耐緘默。大呼起驚看。我來作我遊。渡彼登覺岸。一朝整巾箱。四鄰招侶伴。齊戒期既滿。提携出聖閤。執經詣孔廟。拂拭舊講案。彈指六十年。星物倏移換。公壽近期願。眉宇猶精悍。身經雙甲子。恍若一昏旦。俯仰庠序間。往事思弱冠。兩廡幸無恙。明堂仍舊貫。當階闢泮池。莊嚴復璀璨。此中水清淺。足興望洋歎。淺水雖可掬。至道不可玩。方知春秋嚴。無須游夏贊。公來出至誠。煩勞老不憚。釋菜隨講經。滔滔辯疑難。砥柱遏流橫。快刀斬麻亂。邪說剛萌芽。撲滅不容慢。先覺爲之倡。功倍事則半。借此一遊力。國維賴以扞。何當挽此泮。執頂醍醐灌。果能醒昏迷。奚惜歧途喚。遊亦有正邪。是不可不判。

巖居

中年忽有悟。避世喜巖居。境僻心因靜。身閒交自疏。觀摩千仞石。寄託一園蔬。最是開懷處。看山如讀書。疑是古句

丙寅重九日登陶然亭不到此已十年矣

十年懶到江亭望。風景依稀似昔時。大好河山供戰伐。不堪原野滿瘡痍。黃花近晚堪言節。紅葉經霜倍弄姿。且喜重陽來一醉。敗人清興是征鼙。城南嘯喞逕登高。秋日清新興倍豪。欲遣閒愁宜泛酒。不應亂世尙題糕。白雲天末一羣雁。黃葉溪頭三兩舸。插得茱萸真有幸。橫流汨汨正風濤。

紫光閣

文武丹青列兩班。紫光閣內識尊顏。若分胡夏論功罪。清室動臣便漢奸。

老鷹

健翮今仍在。風塵奈爾何。不隨凡鳥立。堪笑弋人多。一舉衝霄去。飄如掣電過。三秋霜正厲。歲月感蹉跎。

書感

往昔世亂時。尙有山可隱。采薇事高蹈。投荒抱孤憤。巖壑迎幽獨。松石供偃蹇。今日果如何。名山匪佔多。負隅有猛虎。剪徑皆么魔。或自稱寨主。或號爲嘍囉。樵夫戒褻足。逸士愁則那。孰敢入虎穴。雉兔投網羅。小隱隱城市。安巢惟有此。苟不殃池魚。自可庇社鼠。如何爭地戰。四郊復多壘。籠城匝年月。險要各憑恃。鎗烟彈雨中。攻守誇決死。無辜獨小民。踐踏若螻蟻。忍饑不得啼。穴地長棲止。翻羨山居人。東西任遷徙。遷徙安足羨。離別恒酸辛。

一旦去鄉井。萬里冒風塵。殊方豈樂土。到處爲流民。低頭思故里。景物倍清新。繁花發曲徑。好鳥鳴芳春。彷彿桃源裏。自古多隱淪。何意滄桑易。仙境長荆榛。古廟毀作窟。喬木摧爲薪。但有落草者。不見采薇人。

遊三海作

民樂於今惟有此。廿年勞苦說功高。縱嫌斑豹虧全尾。且喜犂牛拔一毛。幾樹含青飄市幌。萬花團錦賽宮袍。鳳池春水平如鏡。誰信滄瀛汨怒濤。

漫書

亂世催成汗馬功。風雲際會古今同。如何見獵仍叉手。冷看他人割據雄。

秋夜

一榻書城坐。寒燈瘦影中。夜聲惟落葉。秋意在吟蛩。流水半江月。遠山何寺

鐘。疑是古句閉門貪著述。清興有誰同。

書懷

醉裏寧知白髮催。拌將愁緒塞罇罍。乍聞高論先心折。時有幽人入夢來。勝境每思窮萬里。奇文不厭諷千回。歌聲自詡摩金石。何日精誠爲我開。

送春詞別婦作

無奈春歸去。從今夢不圓。落花嗟隔世。流水送華年。蝶戀層陰地。鶯啼細雨天。空枝餘黯綠。何日再能妍。

秋意

秋意在何許。黃蘆白蓼間。飛鴻迷遠渚。落葉響空山。水淺衣砧急。霜橫釣艇閒。詩心寄高處。零露倍知寒。

庚午三月心畚昆仲兩度邀賞萃錦園海棠限萃錦句

海棠如美人。含嬌愛春睡。靚妝慵欲墮。東風幾沉醉。我來恣觀賞。無言靜相對。妙香淡入微。得自花之外。茲園富嘉卉。共歎精華萃。就中誰第一。當推海棠最。主人開金罍。賞花酒滿載。春遊須及時。不憚來至再。但恐風姨惡。剪取錦破碎。

百花鬥春妍。燦爛若鋪錦。一遇海棠開。紛紛變凡品。桃李悄無言。梨杏慚顧影。人遊海棠下。如置身仙境。又如飲醇醪。三盃便酩酊。花期苦匆促。繁華過俄頃。一年一度花。點綴陽春景。海棠酣睡時。我亦不須醒。

庚午重九雨雪

躑躅舊都逾廿載。幾曾飛雪見重陽。題糕彩筆須呵凍。插帽黃花慢傲霜。天爲

詩心添畫意。人逢冬至說秋涼。安排九九消寒會。召客登高醉一觴。

公園口占遷都後

芳園春暖我初來。花爲驕人着意開。燕去空梁猶有待。鷹盤絕頂不須陪。一腔心緒鄰枯木。十載功名付冷灰。堪笑渡江春水鯽。仰攀鱗翼幾時回。瀛洲雲路苦迢迢。谷自沉幽木自喬。幸有櫛書撐儉腹。不因斗米折孱腰。時牽黃犬遊東郭。且看金龜賦早朝。惻悵繁華易消歇。江潭疏柳日蕭蕭。

喜秋

涼秋抱不平。騷人對我悲。我來滌煩暑。清爽沁心脾。不勞手揮扇。脫却汗沾衣。蚊蚋衆小醜。掃蕩無孑遺。若論養生術。秋日爲最宜。天高白雲遠。目曠心神怡。山川好景物。嚴淨迎朝曦。林木何明瑟。流水何漣漪。清氣令人健。

遊觀自忘疲。可以發長嘯。可以寄遐思。如何感搖落。遲暮反傷時。涼飈起天末。黃葉辭高枝。寒暑迭代謝。歲歲如瓜期。苟不有往者。何以有來斯。及時貴行樂。曷用長嗟咨。

何伯述南來見枉醉歌贈之

故鄉硯友南海珠。忽喜高軒過我廬。三日不見已刮目。三年不見當何如。剪燭揮塵話契濶。淪茗煮酒爲歡娛。酒酣告我南中事。千變萬化纔須臾。勢如晴空飛霹靂。散爲亂石盤崎嶇。異軍蒼頭突然起。縱橫豺虎雄一隅。殺人如芥滿坑谷。使錢如水盡錙銖。百粵夙稱財賦區。精華蕩盡無留餘。易子析骸一何慘。粒米珠玉價不殊。羣盜如毛更充斥。擄人勒贖無時無。東南半壁成灰燼。荆棘於今塞路途。聽君語罷長歔歔。如見篝火聞鳴狐。安得手提三尺劍。誅彼醜類

清鄉閭。茫茫宏願何時了。空有大膽包頑軀。

寄鼎青

高厚故人意。拳拳例有餘。傳來一夕話。遠勝八行書。慣與寒威抗。難忘淑氣
噓。東隅安足計。收穫在桑榆。

城中

城中有居人。節屆立秋日。自約修其身。欲與秋同立。日出便早起。日入便晚
息。飲食皆以時。作止有定律。讀書不厭多。無事須簡出。行之一日間。兢兢
幸無失。薄暮客叩門。喜遇多年別。舊雨談未終。今雨來相迫。狂注勢傾盆。
風濤起衽席。留客出天意。剪燭話徹夕。詰朝夢醒時。驚看日將昃。東來招夜
飲。催促星火急。馳驅倦街市。徵逐厭酒食。駒光疾若逝。兩日迅過隙。三日

晨興忙。慶弔雜凶吉。忽喜以催妝。忽哀以執紼。如是逐逐間。連綿少暇逸。
方悟人海濶。變化起飄忽。投身漩渦中。粒粟易汨沒。除非入深山。峯頭立兀
兀。四顧長茫茫。我外無一物。

宰人行

西北苦旱歲大饑。人骨爲薪肉作糜。屠戶捉向官裏說。宰人宰豬兩無別。淨肉
百錢賣一斤。雜碎每斤二十文。日出宰却五六口。開市賣盡日未曛。縣官咋舌
聽屠夫。續言宰人勝宰豬。豬死宛轉發嗥叫。人死默默一語無。

盜墓行

佳城鬱鬱洞然開。屍骨狼藉委塵埃。蝙蝠翻飛魑鼠竄。昔日豪華安在哉。路人
指說王耶墓。中埋珍寶不知數。西域輦來瑪瑙盤。南海舶至珊瑚樹。當年發卒

數百人。穿山鑿穴何紛紛。餘威恨不留千古。易世嗟難庇一身。劇盜一夜來如飛。恰同昔日發卒時。昔日鑄墳如鑄鐵。今日削墳如削梨。鋤鋤喧聲達數里。官兵伴睡不聞知。大盜搶明珠。小盜搶玉壺。莫訝分臙判精粗。盜中亦有階級殊。飽載纍纍一閔散。子孫奔至徒驚呼。即今叢棘豐碑倒。日夕牛羊來齧草。人間富貴已成空。地下富貴那能保。

潭柘寺

舊日千章栢。今無一片存。泉流長有韻。寺古不知年。佛頂棲黃雀。僧衣綴白雲。會心潭底影。相對淡忘言。亦俠亦和尚。千秋姚少師。屠刀磨日日。梵典誦時時。出世難忘世。知非不改非。替人爭白帽。猶自着緇衣。

馬鞍山

嶺巖一山石。蟠擎萬古松。此中惟鳥迹。何處有仙蹤。且縱平生目。如登太華峯。紅塵飛不到。元氣尙冥濛。

山靈迎客笑。青眼媚相招。峯峻雲常戀。林幽鳥自驕。好風吹颯颯。華髮散蕭蕭。俯望桑乾水。橫拖帶一條。

戒壇寺

不到戒壇寺。蒼松又十圍。山僧猶健在。林鳥自知歸。破衲將雲補。殘經任葉飛。殷懃留客飯。摘得晚蔬肥。

獅子窩

昔聞入虎穴。今見踏獅窩。谷口狂風吼。山頭落葉多。臨危堪鍊膽。說法可降

魔。况此羌無實。閑閑狐兔過。

秘摩崖

禪隱慕盧師。枕雲聽雨時。石懸空欲墮。崖拔地將飛。有景皆堪畫。無山不喜詩。我來動幽賞。紅葉夕陽遲。

臥佛寺

自在在高臥。頽然橫兩間。參禪惟此好。學佛又何難。受戒羣獅憎。聽經一石頑。似嫌天竺遠。先夢到邯鄲。

大覺寺

到此了然覺。浮生無是非。石如馴虎臥。松作老龍飛。寺額當頭古。鐘聲逗耳微。澗泉清可嗽。涼氣悄侵衣。

寶藏寺

我佛將何寶。空空色相無。已嫌留舍利。底事建浮圖。妙諦存金粟。天香散白
葉。皈依龍女在。不免證明珠。

香界寺

佛外更無佛。山中復有山。鐘聲碎雲表。梵語漏禪關。巖下松何古。世間僧最
閑。我來參妙諦。高遠不容攀。

西峪寺

天機隨處是。妙悟在無言。寺與僧俱古。蓮同佛有緣。林深鳥跡雜。山靜瀑聲
喧。面壁方三日。心齋似十年。

夾道幽花發。迎人上翠微。偶然駐足處。正好賞心時。青嶂籠盈袖。白雲吐滿

衣。日斜山徑暝。拄杖一僧歸。

雲水洞

巖穴自太古。不復記春秋。老佛常居洞。仙人豈好樓。瀑疑吞石去。雲欲挾山浮。愈爲尋幽往。翻知境愈幽。

極樂寺

西郊極樂寺。中有國花堂。花已不知去向窗几涵天趣。琴書泛古香。野蔬鮮可茹。幽鳥澹相忘。坐久生禪悟。胸無臧穀羊。

雜詠五十二首

將軍臨戰陣。如食家常飯。豪語足驚人。聞之背流汗。將軍飯量多。戰士愁奈何。十萬同日死。將軍投袂起。下令捉丁壯。破敵從茲始。

摘瓜莫傷蔓。摘果莫傷枝。農事理至淺。計臣胡不知。古人惡竭澤。斧斤伐以時。如何布密網。一朝盡銖錙。哀汝藝圃者。來歲將安期。羣童喜叫囂。入塾怕絃誦。拋磚並擲瓦。弱年每好弄。奸人投所好。乘機集徒衆。唆之毀戶牖。教以拆梁棟。可憐好身手。縛束爲人用。漢高承秦敝。約法但三章。三章守勿替。足比千萬強。今世尙具文。法令多滋彰。紛更復不時。日夜抄胥忙。旋投故紙堆。積疊成高岡。光怪滿街衢。觸目迷標語。誇誕則有之。實行能幾許。爲治戒多言。空談究何補。勿謂我獨明。汝衆盡聾瞽。當拳即洞腹。龐然笑紙虎。學乃知不足。不學驕自盈。紛紛讀書子。避重咸趨輕。大言文淺陋。瓦釜作雷鳴。欺人復自欺。紫色雜蛙聲。腹笥非所計。頭角須擘嶸。

女子談解放。自養憑職業。失業男已多。女更何消說。戰爭苦迫人。百業隨衰歇。胼手胝足徒。饗殮兩不給。願天具隻眼。垂青向巾幗。

勞資不兩立。貧者恒憎富。有資甘受憎。無資奚我惡。百業日凋敝。東扶西又仆。合力抗資家。資家在何處。無賊張空拳。向天搗烟霧。

古人懷塵罪。今人懷產憂。三椽破茆屋。數畝薄田疇。苛稅重重至。典質應誅求。誅求苦靡已。賤賣無人收。契照委地去。一走萬事休。

監獄誇改良。民風反未改。舍本務齊末。成效果安在。囚人安樂窩。不復愁凍餒。既來方恨遲。屢入却無悔。遇赦跪請留。願長受優待。

大軍偶過境。爲期但信宿。父老咸奔忙。輸金復餽粟。經月不言去。長此占民屋。羅掘四處空。供億苦難足。哀哀小百姓。俯首爲魚肉。

有賊入人家。言歸苦無貲。乞求借少許。永遠沐恩施。旋出械恫喝。搜索無留遺。事畢笑道歉。鞠躬謹告辭。先禮而後兵。此賊殆有之。種樹須十年。斬伐在一旦。掘取到根株。入竈供炊爨。補栽兩三棵。摧殘恒千萬。古柏不懸崖。疏柳不搖岸。斧斤今無情。巢鳥相驚歎。小人缺衣食。不復顧廉恥。我躬且不顧。遑言佛相美。舉椎斷其頭。挾以易銀米。歷代名石刻。秦半被摧毀。古蹟垂千年。末運乃如此。昔日言恤農。豁免上下忙。今日事相反。預徵十年糧。請看父母官。咆哮過虎狼。五日爲京兆。傳舍走倉皇。在位一何短。催科一何長。聖哲若仲尼。政成期三年。庸夫初作吏。責以事萬千。席復不得煖。朞月已屢遷。有才歎無暇。有位嗟無權。一事不及舉。何以分愚賢。

倉廩穀滿盈。守者惡鼠竊。迨值倉廩空。便覺鼠跡絕。乃知鼠來時。稻粱足飽蓄。招鼠鼠不來。蓋藏無餘屑。一鼠物雖小。盛衰憑彼決。

巍巍閱書樓。冬日變煖廠。

北京稱冬日樓流所曰煖廠

書雖一何多。大廈庇土廣。蝸居不舉火

。正愁煤價長。讀書此間樂。圍爐任偃仰。試看春夏時。來者無三兩。

三海觀垂釣。所釣魚非魚。折花以爲餌。持竿笑相趨。漁夫不篋笠。翩翩曳華裾。秋水一投鉤。得魚常有餘。但恐風浪至。不獲長歡娛。

兵多若螻蟻。羣帥爭稱強。各擁烏合衆。割據雄一方。紙幣充作餉。罌粟持作糧。廿年無義戰。鬧市變沙場。弗能制侵凌。但在多殺傷。

化農爲兵易。化兵爲農難。鄉愚舍耒耜。投身行伍間。所學惟殺戮。所過惟摧殘。渾然淳樸性。一變成兇頑。遣散歸里去。放虎還深山。

兵每好自化。一化便爲匪。官私縱兩殊。性質全相似。聞道巢穴中。儼與治軍比。分贓名放餉。拒捕誇敢死。嗟嗟匪與兵。一邱之貉耳。

銀行如林立。專爲發鈔來。鈔多變廢紙。行門遂不開。危樓衝霄漢。改作避債臺。臺下持鈔人。其聲悲以哀。臺上發鈔人。其樂悠悠哉。

佛說諸戒律。最嚴戒貪癡。自古皆有死。輪迴安可期。佛獨求不滅。翻作來世思。貪癡此爲極。百口爾莫辭。立戒先自犯。徒貽識者譏。

武王伐紂日。殷士咸倒戈。古意今消失。紛紛效尤多。肘腋生變患。袍澤乖祥和。雲雨喻交態。翻覆一刹那。勸君慎出入。世途滿網羅。

佳婦勤女紅。晨夕司中饋。古稱賢內助。白首從夫婿。如何效時裝。廣場忙交際。釧聲隨舞墮。衣香臨風曳。晚歸睨雛兒。垢面蒙流涕。

昨爲委巷女。今爲百里侯。衙堂何森嚴。出入喧鳴騶。兵刑錢穀事。一一付女流。問彼何所長。居然占上游。世局翻新樣。時會爲推舟。將來民智日增。婦人爲縣長省長。不足異。今則相

差尙遠。必以是立異。地方事愈不堪問。

人爲萬物靈。惻隱出天性。世亂奇變多。言之駭聞聽。猙獰惡魔會。黨徒一時盛。梟却親父頭。齋爲入夥證。嗟嗟獸心人。兇殘過梟獍。湘粵入共產黨會。須弑其父。鬻頭爲贖。

耿耿柏舟節。末俗可以風。婚嫁況自由。此情人所同。孀婦棄膏沐。螻首甘飛

蓬。幽蘭生泥塗。惡草不爾容。悍然奪其志。空幃守難終。湖南共產黨拆毀風簷局。迫令孀婦改嫁。

婦女裸體遊。聲言破羞恥。皮肉任觀賞。招搖過街市。幸遇炎熱時。橫流成禍

水。何不至朔方。雪地冰天裏。一掃氈裘俗。嚴冬亦爲此。共產黨在漢口舉行裸體遊行。名曰打破羞恥運動。

縛草貌孔聖。昇行徇四城。一步一鞭扑。雜以怒詈聲。蜉蝣爾何妄。螻蛄嘩然

鳴。春秋且不知。俄頃隕浮生。戟指呵日月。果何傷其明。

事亦共產
黨所爲。

出版與言論。聲聲許自由。禁令反日嚴。異己一網收。誹謗有常刑。重者遭拘囚。羈馬須立仗。寒蟬畏高秋。任汝百鍊剛。化爲繞指柔。劉越石句

神女若驚鴻。買笑須千金。千金只買笑。萬金不買心。貞操俗所棄。浮華相追尋。好花不長妍。皎月易消沉。車馬倏冷落。徒爲白頭吟。

當壚卓文君。搔首自弄姿。意不在沽酒。但愛春日時。座客患常滿。裘馬門輕肥。亦不在飲酒。孤負三雅卮。問客意何在。旁觀那得知。

武夫不尙力。沾沾喜尙文。通電發宣言。詞藻何繽紛。各務列筆陣。橫掃千人軍。干政非所嫌。假語恒亂真。興風隨作浪。覆雨旋翻雲。

今世士大夫。佞佛尙茹素。齋口不齋心。逐逐貪如故。屠刀常在握。情慾淆喜

怒。閉門擁粉黛。開門納賕賂。持此求長生。轅轍南北誤。
魏璿稱聖人。指鹿便爲馬。死黨據要津。生祠滿天下。時享獻太牢。樂章奏大
雅。一片歌頌聲。語語全虛假。明允辨奸論。當時無聽者。
人反獠狃時。庶幾產可共。巧拙兩不分。賢愚等無用。蠢蠢類木石。冥然泯爭
閔。不幸化早開。民情日繁重。倡言齊物論。蛇蝎攢一甕。
老妻悍且醜。願與衆共之。少婦美而艷。跬步常弗離。主張兩殊異。各自顧其
私。出郭何所見。獠狗野合時。猖然相爭噬。羣雄逐一雌。
僮夫談文學。不先讀詩書。根本既欠闕。枝葉將何如。欺世盜虛聲。率爾惟操
觚。招豚入其筮。哆口憑一呼。嗟爾年少人。曷爲從彼屠。
僮夫談歌曲。樂府詡翻新。試觀彼所製。亦復陳相因。剽竊舊調頭。既全失其

真。摹寫今風俗。又不傳其神。聒耳聲嗚嗚。盡下里巴人。
俗劇何所貴。貴弗辨雄雌。一般弁而笄。兔眼何迷離。鬚眉氣安在。曼聲唱俚
詞。持此誇多藝。反貽人妖譏。陽春任自然。白雪在無疵。
名器變不名。滂沱動章雨。甘霖沛然施。膏澤在何許。請看爛羊頭。居然關內
侯。得之弗足喜。失之弗足憂。悔煞閨中婦。迎春上翠樓。
災民鬻兒女。得價不如豬。十金買一豬。一金買一奴。弗賣餓將死。賣之或可
蘇。間關抱諸孤。長跪泣當塗。處處人爲市。慘哉流民圖。
勞人終日勞。不得飽一粥。故意觸刑網。投身入犴獄。囚糧有定例。安坐便果
腹。生活歎艱難。得此願已足。飢寒迫人來。誰暇計榮辱。
袁氏攬國政。儼居九五尊。實至名未歸。黃袍念常存。我不家天下。曷以傳子

孫。廣徵勸進表。洪憲遂紀元。宛矣景升死。清門餘犬豚。

五穀任農栽。黍稷稻麥菽。如何嚴告諭。勒令種罌粟。五穀稅捐微。官吏中飽稀。罌粟稅捐重。官吏飽而肥。但計官吏肥。那計小民饑。

擄人勒贖錢。名曰請財神。財神久絕跡。請者猶紛紛。劇盜日披猖。財神多苦辛。忍痛鬻田宅。持以贖其身。倖得脫虎口。骨立成赤貧。

廩粟嗟告罄。代之以城磚。官俸雖新制。國恩仍舊存。支床龜極穩。差足慰寒

酸。羯來賦燕城。雉堞夷平原。皇皇抱關吏。無關復奚言。內務部拆皇城磚發員詞欠薪。

議員八百衆。一旦化爲豬。老豬飽梁肉。小豬舐餒餘。便便大腹賈。持笠來招

呼。重金收買去。付與收豬奴。賣身豬勿喜。須防刀下屠。曹錕賄選總統。每票五千金。一時議員有豬仔之目。

是非最無定。曾左成罪人。昔日稱首功。今日稱貳臣。胡越爲一家。造物本無

分。春秋重大義。不憚滅其親。董狐久絕筆。青史滿生塵。
猛虎落檻穽。搖尾而求食。子長腐心語。千古同一轍。我亦乞憐者。狂搖尾幾
折。仰首聊鳴號。俯首長太息。懷才不遇時。蹙蹙爲飢迫。

詠狗

黠夫爭秦鹿。愚夫爲獵狗。狗死嗟已多。鹿死知誰手。紛紛狗盜雄。腰間印如
斗。劉項勝未分。狗骨何速朽。

歸化道中

絕塞風沙惡。高原草木低。鳥聲空際沒。日影磧中迷。詩思橫驢背。鄉心逐馬
蹄。遐荒天界闊。渾不辨東西。

無題

憶婦而作也。予婦爲法蘭西人。年十八嫁予。中道離異。予之過也。美人恩愛平生感。少日心情老後知。最是月斜孤館外。五更涼露立多時。却悔當年故我狂。看花不解惜花香。如今花落隨流水。一度相思一斷腸。欲把相思付客船。滿江秋水碧於天。一從灑淚江干別。魚雁消沉又十年。遺衫浣手用香薰。狼藉斑斑舊淚痕。鬢影不存衣影在。箇中心事向誰論。

春歸

春自因花到。花殘春亦歸。只餘枝上鳥。不住向人啼。柳色青青地。橋南望欲迷。垂絲如許弱。那得縮征蹄。

五十

四十九年誤。何勞五十知。夜長逢月落。冬冷覺春遲。幽獨每遺世。疏狂欲變

癡。半生如大夢。醒否至今疑。
不慣泥塗辱。孤標愛獨清。壯幾投筆去。老轉藉詩鳴。種種一朝逝。茫茫百感生。悲歌聊拊髀。豪氣尙縱橫。
半百年華過。居然鬢未斑。養心明拙性。強笑作歡顏。浩浩一江水。峨峨萬仞山。大才多委棄。爲用古來難。

感懷

抱負終何用。韶光不再留。山河危累卵。風雨撼孤舟。世味同雞肋。浮名笑虎頭。萬方正多難。有客怕登樓。
失地日千里。神州易陸沉。憂時空扼腕。聞警倍驚心。我有伊川痛。國無喬木陰。江南望江北。極目儘哀吟。

漫興

一生傲骨醫難換。眼底雲烟萬事過。得句欲新詩轉少。買書成癖債因多。牢愁
易起須傾釀。逸興如飛且放歌。剩有撐胸奇氣在。國危身老漸消磨。
愁人借酒強安排。風滿迴廊月滿階。儘有文章供嘯傲。拌將心事託談諧。不時
搜索腸彌瘦。逐字推敲句漸佳。塊壘欲消消未得。淋漓醉筆寫秋懷。

跳舞場

春去春來花自香。春愁滿抱向歡場。方知舞燕兼工媚。一作遊蜂便學狂。人在
少年都慘綠。我逢晚景漸昏黃。曲終酒罷華筵散。安得華筵萬日長。

伏處

伏處向巖穴。居然隱者流。竹搖雙眼翠。雨納一襟秋。短髮愁看劍。孤懷悄倚

樓。浮雲了無意。長日共悠悠。

詠秋蟬 九一八後

黃葉牽秋到。鳴蟬知未知。依然戀高樹。猶自抱殘枝。往日喧如許。今朝空爾爲。繁霜滿林樾。問汝欲何歸。

雜詩

興來得詩著語工。擲地金石能醫窮。振衣出門作虎嘯。橫絕大海聲摩空。南國佳麗數吳姬。北地燕支亦擅奇。美人壓酒遣長夜。消魂真箇恐成癡。春江蕩漾波生光。夾岸柳絲相與長。繫馬繫愁渾不管。底事行人愛斷腸。羯奴擊鼓催花落。越女彈箏花爲開。花開花落尋常事。年年春去又春回。六朝如夢不會醒。細雨斜風下秣陵。疑是古句人物一時無俊傑。江山千古自英靈。

奇意翻空次第生。少年才氣喜縱橫。詩於晚歲歸平澹。天遠無雲月五更。
渾沌死時七竅開。世間原自不宜才。才人易被聰明誤。煩惱端從識字來。
回天壯志漸消磨。附體空存俠骨多。滿眼分明恩怨在。干將不利欲如何。
一着征衫便惹塵。鬢絲漸改鏡猶新。平生浪有三奇癖。山水文章並美人。
去去棲身冥漠間。鹿豕狂狃松石頑。從此不聞天下事。一雙青眼只看山。

踏青行

吹錦春風來浩蕩。野外桃花大於掌。出城隨作踏青行。一路蘼蕪十萬丈。路旁
家家掃春墳。生人死人偶相親。死者不語自太古。生者語多人厭聞。我亦炎炎
悔多語。議論雖豪無足取。向死人語死不知。向生人語人懷疑。何如默爾携柑
酒。醉臥隴畔且聽鷓。醒來惘惘轉惆悵。柑酒已盡鷓亦稀。忽見新墳添爾許。

去年踏青纔幾時。

春興

啼遍流鶯綠樹間。長橋曲曲任凭欄。風光入袖如相挽。草色沾衣莫誤彈。待到花時圓好夢。每因梅雨怯輕寒。青山別有春來面。不獻新詩不許看。乍醒揚州夢裏身。畫樓金粉易成塵。何妨醉酒經千日。最願看花盡一春。高臥滄江原有託。滿懷風月未爲貧。眼中羨煞雙飛蝶。占住香紅不讓人。

花外

花外聞花別有香。幾人識得此心腸。曉風斷岸詩逾澹。明月高樓酒易涼。聽曲每生愁似水。開尊那管鬢如霜。年來漸覺雄談減。喻到無言意更長。

有贈

髻髮皤然一老夫。經年流轉向江湖。詩書燔後無窮鬼。天地翻時剩酒徒。孤劍不曾磨俠骨。八叉容易斷吟鬚。風塵撲面何人識。燕市由來滿狗屠。

黑龍潭距溫泉八里

溫泉水溫龍潭冷。兩泉相向還相反。龍潭黑龍最神奇。往往出潭爲雨師。清帝祈霖屢降驛。紀龍功烈多豐碑。吾聞龍顏本蒼赤。汝胡黝然黑其色。得無發跡從冀州。淮南子，女媧氏殺黑龍以濟冀州。來此噴雲如噴墨。一噴旱魃逃。再噴槁苗高。甘澤霑足一犁膏。不毛之地亦生毛。雲收雨止歸潭裏。滿潭遊魚盡龍子。螭屈終逢霹靂時。變化須臾騰萬里。野老諄諄說神靈。我爲姑妄傾耳聽。一泓潭水清泠泠。撲鼻髣髴聞龍腥。縱教薄海施霖雨。何似盈池變醪醢。

問春

去日春從何處去。今日春從何處來。日日問春春不語。眼中花落又花開。

客自巴黎返詩柬之

瀛洲遊罷賦歸來。久別逢君笑口開。奇士壺中藏日月。騷人筆下起風雷。滄溟浪湧羣峯立。關塞霜繁一鴈哀。故國那堪重回首。淒涼喬木委蒿萊。

不寐

百感催華髮。中宵發浩歌。愁來驅不盡。起問夜如何。竹影寒窗碎。蟲聲落葉多。長吁看壁劍。爾我兩蹉跎。

初春公園口占

芳園引客詠新詩。况值風和日暖時。浮綠乍生魚自樂。淺紅微綻蝶先知。一年只盼花開早。四季惟愁春到遲。柳短絲長牽不斷。離人曾否寄相思。

論詩

詩中須有我。我中復有詩。名山孕名句。秋雨動秋思。興到詞方妙。神來筆乃奇。苦吟入醋甕。難與性靈期。

返山居用老杜玉華宮韻

尋春逕入山。我是樂山者。峯迴路勢轉。清泉石罅瀉。僕夫肩行李。健步捷過馬。迢然至茅廬。結在松陰下。木蠹鑽房檐。野雀巢屋瓦。驚看手植樹。當階已盈把。空山少人迹。景物何瀟灑。來此養性真。得真可忘假。

五華寺訪友不遇

採藥何方去。雲橫歸未歸。千山百草長。萬木一鶯飛。屐響出寒碧。鐘聲隱翠微。桃花舊仙館。有客叩斜扉。

小園花盛開逕臥花底

滿園花發風吹香。盡日看花我欲狂。夕陽西下未忍去。逕爾花脚支匡牀。抱衾眠花意殊適。沉沉蝶夢含蒼茫。驚回星月掛林杪。花氣襲人生微涼。日看不足繼以夜。一日化爲兩日長。年來世事灰心意。祇有對花神飛揚。如何花開不縱賞。坐令春日去堂堂。

戒壇寺臥龍松歌

南陽迢迢千餘里。諸葛胡爲遠來此。松中諸葛長蒼然。人中諸葛今已矣。此松不知自何年。逕投佛寺橫階眠。濤聲謾謾鱗甲動。勢欲飛去凌雲煙。虬枝夭矯紛拏攫。獅虎憎伏鷹隼落。偃息不忘霖雨時。待爲蒼生露頭角。我來遊戒壇。對松嘖嘖稱奇觀。巨幹倒壓石壁間。欲伸不伸蟠不蟠。之而作態老且頑。我願

騎汝入海探神山。蓬壺石室恣登攀。琪花瑤草何爛斑。又願化身爲鸞爲鶴爲白
鷗。披羽爲衣飲露以爲餐。島中訪求不死丹。臥龍笑我願無極。弗肯爲我翻霹
靂。憶昔初來此刹時。借得老僧地一席。有約許以不許飛。深恐龍飛破僧壁。

書所見

偶過城南舊酒樓。樓中夜夜唱涼州。古局如今寂寞歌塵散。一婦當壚亦白頭。
綠女紅男鬥麗都。惱人春色罩平湖。先生竟日觀垂釣。釣得魚肥問羨無。
老屋惟存木一章。先人手植蔭垂堂。朝來縱斧無休歇。聞道兒孫已絕糧。
養舍如林滿舊都。廣開豚笠召生徒。妙年不慣寒窗苦。游手街頭當讀書。

將進酒

花作圍屏錦作堆。笙歌和月滿樓臺。吳姬舞罷還行酒。拌醉如泥爛一回。

陽臺杏花歌

陽臺杏花三萬株。株株香色都不殊。我來盡日看花飽。便欲安排此間老。就中有嶺名管家。惜無溪流賽若耶。東邊一片如堆錦。西邊一片如蒸霞。霞蒸十日鬱不散。錦堆十里何凌亂。霞可餐兮錦可衣。使我身輕仙欲飛。欲飛又住生留戀。待到花殘飛不晚。但願此花時時開。看花不憚復飛來。

春恨

殘衫檢點待春歸。一別經年未忍違。燕不忘情還入幕。花如有淚定沾衣。只緣懊惱容爲減。欲戀芳華計已非。柳絮朝來添幾許。離人雙鬢已成絲。

願和園看花歌

天孫椎碎赤城霞。散作願和園裏花。我來看花添詩債。沐浴薰香向花拜。奇葩

異卉不知名。妙香聞在花之外。穠者吐豔嬌欲然。淡者無言靜相對。一花一花有一態。萬花合成花世界。一我大笑花叢中。驚起花神神弗怪。花神髣髴向我言。不堪頭白話當年。母后生平有花癖。曾爲花空內庫錢。遐方輦至上林種。民脂有限難供奉。方冀長爲苑囿娛。誰知却把江山送。銅駝冷落黍離離。昆明池水自漣漪。話到興亡花不管。又值春風索笑時。

贈友

斫地揮長劍。酒酣歌莫哀。孰能醫亂世。天欲老奇才。皓月望常滿。名花春自開。良時會須至。拔爾出蒿萊。

探春

出門邈迤作郊遊。積雪陂塘凍漸收。萬綠夢殘呼欲轉。春光悄着柳梢頭。

惜花吟

東風陣陣吹花開。胡又陣陣吹花落。落紅滿地愁煞人。人人都怨東風惡。東風吹花本無心。花開花落自古今。繁華過眼春如夢。空爾惜花嘔血吟。

南行道中

紫陌平鋪草似茵。東風吹雨洗香塵。綠楊繞郭鶯聲軟。春到江南已十分。

邗江夜泊

萬家燈火照清秋。遠遠笙歌鬧酒樓。明月滿江舟一葉。載將詩夢到揚州。

秋江晚眺

秋江望不極。鋪岸只平沙。船戶舟爲屋。漁人水是家。亂峯爭落日。古木起盤鴉。帆影浮天外。因風片片斜。

召客飲城南酒樓卽席賦示

花片當飛箋。繽紛墜客前。酒香吹短鬢。燭焰冷哀絃。春雨連三月。秋風又一年。開懷對醞醕。拌醉傍壚眠。聚散同萃梗。天涯偶一逢。雄譚生席上。樂事在盃中。酒自隨時綠。顏能幾日紅。故人情意厚。薄味亦成濃。

山居

壺公棲宿地。風雨四時宜。屋破將雲補。簷欹借樹支。枯松留作籟。野棘截爲籬。更有爪痕在。淋漓滿壁詩。

村莊卽景戲嵌數目字

幾畦苦菜幾畦瓜。短柵疏籬三兩家。一片水塘環半面。萬千蓮葉擁蓮花。

山居題壁

萬山最深處。中有讀書堂。孤鳥悄無語。幽花微送香。巖泉供嘯傲。木石皆文章。歌哭都成籟。高風接渾茫。

渾河舟次

扁舟發渾河。河水流浩浩。一年兩度過。跋涉京西道。風塵常撲面。容顏易衰老。春花發苦遲。零落一何早。木葉鳴兩岸。秋風黃百草。安得如此水。年年長美好。

階下口占

四壁蟲聲一草廬。空階小立不嫌孤。過雲片片追秋月。倩影穿花時有無。

清秋

金井梧桐夕照遲。一聲葉落雁先知。清秋爲我添詩料。好是楓丹露白時。

歌風臺

彭越蒞醢黥布誅。漢祖還鄉樂何如。流連一飲盡十日。沛中父老騰歡娛。狡兔已死烹功狗。子弟無功恩反厚。當時豐沛滿椎埋。曷不用爲四方守。酒酣起唱大風歌。喜看帶礪漢山河。慷慨偶然思猛士。猛士含冤地下多。

詠史

長平阬卒四十萬。鉅鹿再阬又一半。阬儒之數不可知。四百六十聊存疑。一時殺人若艸芥。殺恐不及生阬之。嗟嗟殘暴乃至此。數十萬人同日死。高。鬼神愁慘天無光。豺虎跳躑癩狗狂。寡婦孤兒相抱哭。豈有阬人如阬蝗。罪魁白起先作俑。始皇項羽兩接踵。忍將深谷當屠場。逕以長阬爲大家。積尸滿穽血花

斑。埋骨千年未肯寒。讀史似聞冤憤語。不禁怒髮爲衝冠。

贈定礎

久別相逢各惘然。客中况味雨中天。故人白髮添多少。惆悵西窗話少年。

秋日舟中口占

蘋花點水亂紛紛。風送歸舟趁夕曛。木落江空詩界闊。一團秋思塞乾坤。

秋郊

盎盎村居趣。林幽人亦幽。遐思逐流水。豪語撼危樓。葉落聲聲雨。江空處處秋。涼風動蘋末。吟興上心頭。

種菊

持鋤劬土似田家。不種柔桑不種麻。日日東籬勤灌溉。一秋心事寄黃花。

西風

西風吹得鬢毛蒼。山字詩肩壓晚涼。紅葉滿隄秋意老。一聲啼鴈惹繁霜。

適意

插架牙籤不染塵。一堂相對樂晨昏。當窗皓月如嬌女。排闥青山似故人。軒冕無心甘守拙。文章有限喜求新。且融彭澤詩中意。更挹昌黎筆下神。

飲什刹海酒樓呈座中諸公

高樓無夕不飛觴。四座花香夾酒香。有客凭闌開醉眼。好風吹雨過橫塘。了無長策能匡濟。且惜餘春事宴遊。欲老溫柔須縱酒。醉鄉風味最溫柔。暫染顏紅借綠醅。開尊那管漏聲催。春愁如海難容貯。恨不撐開掌上盃。

興到

不知古更不知今。興到聊爲抱膝吟。長與先生共晨夕。一書一劍一張琴。

九秋

殘葉無多落漸稀。清愁不覺減腰圍。九秋詩思在蘋末。白露橫江一鴈飛。

秋夜對月

萬籟團成一籟聲。秋階如水洗空明。滿簾涼月饒詩思。句沐蟾光分外清。

秋夜口占

葉落空階一尺深。林梢月暗夜沉沉。騷人滿抱添秋思。付與寒螿細細吟。

聞戶外桂香有作

閒身倍愛賞清幽。何處飄香入畫樓。月影橫窗詩夢冷。桂花新釀一簾秋。

平生

平生浪迹遍江湖。五十年來鬢尙烏。書劍飄零肝膽在。故吾不見見今吾。

秋山

棗葉深黃柿葉紅。滿林詩意夕陽中。秋山骨比春山秀。如削峰頭睨過鴻。

寫懷

寂寞南陽處士居。了無三顧及茅廬。獨行花徑尋佳句。閒倚芸窗讀異書。枉自
嘔心貪著述。不妨浪迹託樵漁。可憐少日飛騰志。垂老翻成一腐儒。

鬢絲如許只緣愁。一樣頭顱愧馬周。今日喜從閒裏過。何人悟到死前休。且隨
皓月歌中夜。莫向狂瀾據上游。際會已虛垂釣老。明珠暗劍不相投。

偶詠

懽樂歲月短。煩憂歲月長。歲月本無別。人各有心腸。同此春花香。同此秋月

光。花前月下人。或笑或悲傷。笑者何所笑。隨地作歡場。悲者何所悲。戚戚若居喪。歲月渺無盡。憂樂亦無常。所以巢居子。遊心冥冥鄉。

園中吟

入世情逾淡。尋芳興轉濃。池邊春艸綠。花外夕陽紅。日羨魚遊樂。時聞燕語工。浮生寄何處。佳趣一園中。

看桃李

把酒看桃李。千鍾醉不辭。只愁春老去。花落對空枝。

田間

幾穗青青幾穗黃。野畦一片稻吹香。書生欲向田間老。閒與羣鷗較短長。

有感

莽莽神州大。陰霾豁不開。人如豺虎立。孰有鳳麟哀。國事從何說。天心似未回。賈生空太息。無計効涓埃。

觀碁

斷續碁枰響。分明此局枯。只緣一着錯。遂令滿盤輸。坐隱從公等。晉人謂圍碁曰坐隱。旁觀有老夫。豈難尋勝算。其奈解人無。

對酒

難得人生笑一回。今宵有酒且銜盃。儘教肘後懸金印。爭似罇中滿綠醅。蝶醉因思尋夢好。蜂狂不死待花開。青州從事時相過。對汝還邀月作陪。

古意

誓海海不深。盟山山有缺。持此一片心。逕比萬年月。

故宮御花園

幾度上林過。春來懶着花。可憐宮柳綠。鶯去只棲鴉。

極樂洞

入洞疑無路。白雲深幾重。一聲孤鶴淚。雲破湧青峯。

偶詠

樹爲今人綠。還猶爲古人。不煩答君問。狂笑一千春。
惡草正繁滋。安能樹蘭蕙。土壤本無殊。所爭在根蒂。
鳴蜩據木末。如拜小諸侯。可憐吟未了。葉落忽驚秋。

絕句十九首

山有萬古心。復有四時色。時時看不厭。滿眼浮空碧。

絕澗有流水。高山無鳴琴。懷人在天末。白雲證我心。
皎月遲未上。疏林晚煙鎖。野景足幽絕。隔江閃漁火。
山僧自炊飯。抱甕汲水井。春來有好蔬。雨苗一林筍。
孤舸泛夕陽。兩岸拍紅浪。何處送歌聲。嫋嫋采菱唱。
空山寂無人。鳥聲鳴相和。微風灑然來。巖花被吹墮。
心緒寄扁舟。飄飄逐水流。手提青箬笠。煙雨一帆秋。
水面金銀氣。白蓼間黃蘆。怪道鴟夷子。扁舟樂五湖。
雲罩一庭陰。鳥雀寂無語。修竹響瀟瀟。隔簾過疏雨。
霜葉斜陽裏。春花無此紅。夾江沙渚遠。秋色在丹楓。
一水遠浮青。萬山橫積翠。紅葉抹江邊。白雲抹天外。

秋意在何許。平沙淺水間。霜楓橫兩岸。紅到隔江山。
鳥宿秋林後。蟲鳴晚砌初。一簾殘雨歇。淡月影蕭疏。
幽賞不知處。行行路幾重。涼月一潭水。清到石魂中。
只道怕生愁。如何又上樓。月光揮不去。悄報故鄉秋。
高人愛山居。長吟抱幽獨。謾謾兩古松。濤聲捲茅屋。
今冬足可惜。畏冷未尋梅。淡月孤山外。橫斜衝雪開。
啼鴉喚不醒。春山濃欲睡。微雨過江來。洗出千巖翠。
憇坐松間石。遊衫損古苔。口占句清絕。只爲聽鷓回。

春吟

風光如醉好流連。一路蘼蕪綠到天。春鑄詩人心似錦。許多佳句吐花前。

吟興經冬被冷欺。雪中索句得偏遲。喜從驢背移詩思。掛在春風第一枝。

即景

小溪碧漲兩三灣。樹自扶疏鳥自閑。一疊白雲遮半面。怕人看煞好青山。

春寒

十日春寒結苦陰。東風無力晝沉沉。看花興致濃於酒。渴對壺觴怪不斟。

春衫

狼藉春衫舊酒痕。十年冷却不曾溫。風流往事那堪憶。寂寞巾箱鎖夢魂。

蕭郎

蕭郎路上費思尋。不是侯門亦海深。羨煞飛飛春燕子。逕穿簾幔傍芳琴。

閨思

草綠王孫去不歸。相思日日減腰圍。隴頭碧水秦隄柳。又惹春風到馬蹄。
閨情

無意添香懶試衣。侍兒癡報牡丹肥。珠簾不捲闌春入。一任庭前蛺蝶飛。
夜聞鄰歌

冷月鋪階露氣深。隔牆聞唱白頭吟。愁人最是知音者。未到曲終淚滿襟。
二月

二月陰陰楊柳天。春華有夢不曾圓。東風着意催花發。又是浮生第幾年。
憶江南

一年時節憶江南。春雨春風三月三。枝上杏花枝底蝶。未曾入夢已香甜。
絕句

亦濃亦艷亦清幽。一例詩筒夾酒籌。秋月冷砭高士骨。春花紅上美人頭。

老馬

朔漠嘶風萬里餘。錦韉玉勒一名駒。可憐老去空皮骨。流汗街頭挽做車。

詠劍

十年買劍不曾磨。只伴書生斫地歌。呷酒一鍾看一遍。酒痕長比血痕多。

感舊

惆悵空樓燕子飛。倚樓人去已多時。只今剩有樓前柳。又見春風上舊枝。
過眼鶯花總有痕。愁懷常怕傍黃昏。不知今夜當樓月。記否年時照翠顰。

漁家

漁家三五炊烟起。日暮歸來造飯時。多少渭濱垂釣者。一竿老去有誰知。

春曉

無邊春色上簾鉤。早起看花獨倚樓。難得花開容易落。朝朝風雨替花愁。

春日偶成

處處花開處處春。無端襟袖染香塵。春來豪興濃于酒。日日看花似醉人。
艷絕仙姿妙絕香。淺深濃淡費評量。萬花爭寵還相妬。最得人憐是海棠。

病起

一春瘦損沈郎腰。庭院深深鎖寂寥。裊裊爐香人悄悄。沉沉簾幙雨瀟瀟。

山中夜雨

陡然天半起波瀾。亂葉敲窓夢未殘。枕上忽生浮海意。夜來一雨響空山。

雨後

溪流彎曲長蒲菰。近水人家日放鳧。春漲一隄新雨後。野苔青到石痕無。

蕭閒

蕭閒渾與世相忘。抱膝精研處土方。幾架殘書兩間舫。半簾疏雨一爐香。

有懷

鍾期已死孰知音。日日尋幽獨放吟。一片妙心無着處。高山流水不聞琴。

暴雨有作

窗外雷聲雜雨聲。拔山倒海意難平。壁間掛劍欲騰去。驀吐寒光時一鳴。

始見白髮

勞生日爲稻粱謀。輪鐵消磨未肯休。白髮幾莖初報信。不堪逢着棒當頭。

詠白髮

春殘無計挽芳菲。鏡裏蕭疏鬢欲絲。搔首自傷還自慰。幾人能到白頭時。
落花

殘紅鋪地似氈氍。過眼繁華事總虛。蝴蝶自飛花自落。不因采擷待須臾。
惜春

落紅貼地悄無聲。惹起新愁次第生。點滴沾衣防洗去。欲將花淚染心情。
憶春

無奈春歸付一嗟。早知留不住繁華。殘紅落後餘蝴蝶。只趁畦邊采菜花。
過祿米倉

已無粒米但空倉。斷瓦頽垣戀夕陽。鼠竊始知成物瑞。官廩畢竟有餘糧。
雜感

杏花紅罷菜花黃。殘春欲去留餘香。美人對景感遲暮。不禁清淚沾羅裳。
踏遍城頭月色多。好風吹耳時聞歌。撩人最是歌中意。盪斷柔腸可奈何。
春耕十畝高復低。青青郭外種瓜畦。故侯心事含孤憤。甘把鷄棲當鶴棲。
冷落朱門長綠苔。夾門石獸尙崔嵬。銅駝且怨埋荆棘。疇有閒情弔汝來。
玉泉山下故行宮。寂寞宮花懶不紅。白頭宮女感星散。再無人曉說玄宗。
拂盡離人隄畔柳。載盡離人水上船。獨有送行千斛淚。長流不盡暮江邊。
短髮星星忽有霜。驚看歲月去堂堂。未了平生匡濟願。孤負春華夢一場。
山川蟠踞如龍虎。坐看沐猴此中舞。世間咄咄怪事多。笑哭不得心肝苦。

詞人

一作詞人易斷腸。摩挲雙眼對滄桑。魚龍風雨歸消歇。無語江山送夕陽。

郊遊

信步不知路幾盤。春郊風景眼貪看。鰕魚遊出排成陣。胡蝶飛來舞作團。花影搖紅迷曲徑。草香吹綠到孤村。數間茅屋疏林繞。鷄犬無聲晝掩門。

途中口占

衝開柳色轉征車。到處爲家不算家。無限旅愁寄飛絮。隨風飄蕩到天涯。

不寐

欹枕不成寐。黑甜何處鄉。風嘯千樹籟。月浸一簾霜。久坐心因靜。無眠夜自長。悠悠羨孤鶴。清夢入微茫。

兵車行有序

香山四王府村廟中。駐有某軍一連。兵士常與予之僕夫交談。一日喜告僕

夫。云接到開拔令。明晨即開往戰線。發財時機至矣。僕夫問戰線何能發財。則答云。將搶掠附近村市。僕夫轉告予。予感而賦此。嗟夫。今代之兵車行。有爲老杜所料不及者。豈進化之故歟。

馬蹄踏踏車鞦鞦。壯士長鎗各在肩。眉飛色舞若有喜。勇赴戰場不怕死。戰場白骨氣森森。眼中但見堆黃金。殺神不爲開方便。杳杳黃金何處尋。我聞辦帥

張勳服官民國而不剪辮。時號爲辦帥。

鎮徐州。手統十萬之貔貅。有例發鎗不發餉。欠餉須從戰地籌。

攻得一城下一邑。縱兵大掠盡三日。挨戶搜索無留遺。積年發餉在此時。限期苦短容易滿。慾壑尙難填一半。皇皇出示始安民。官樣文章原不算。小草生來易感風。六軍希望一般同。即今步向沙場裏。無殊身入寶山中。

徵糧歎

萬馬奔騰入農村。蹴起黃埃高蔽天。農夫揮汗集芻粟。飛挽惴惴輸軍前。夏日田間耕作苦。晴犯驕陽陰沐雨。僥倖能收十斛糧。大兵過境索壺漿。年年官租納弗足。老婦饑啼兒女哭。今朝粒穀不敢畱。畱恐兵來拆吾屋。

詠史

荆軻錯手負燕丹。博浪一椎未報韓。腐儒覽史爲惋惜。祖龍果死爾何干。齒剛易折翻能久。柔舌長存不百年。象箸屢籌天下計。張儀三寸早成煙。滑稽人說東方朔。軼事流傳話自佳。孟堅亦是浮誇者。誤將漢史作齊諧。老馬騰槽迹已彰。阿瞞後顧欠深長。景升生子誠豚犬。豈料君家有爽芳。伯溫學爲梁父吟。功成毒死何惜惜。乃知子房智超絕。赤松之遊託意深。

追懷吳星蒼師師諱萃英。粵人。

飽學吳夫子。胸攤萬卷書。海寬緣量大。樹老更心虛。雨雪飄詩句。溪山入畫圖。至人甘澹泊。遺行世間無。

客中清明

清明時節倍思親。客裏逢春却怕春。啼鴉一聲楊柳綠。了無風雨也愁人。

種烟謠

昔日有田種五穀。今日有田種罌粟。五穀利薄罌粟多。羨煞鄰舍翁。歲贏巨萬腹皤皤。小人見利無不愛。爭學種烟如種菜。賺得賣烟錢。買田長子孫。烟田百頃遺孫子。箇箇吸烟孱欲死。

高詠

曲徑無人草自芳。閉門高詠作詩狂。三間茅屋生虛白。一院槐陰鎖淡黃。有限

閒愁消茗盞。幾多心事寄鑪香。劇憐老樹婆娑甚。猶共牆花向夕陽。

宗子威自湖南以詩見寄賦此奉答

讀君寄詩如有神。妙句得自湘水濱。沐浴洞庭之秋浪。翕吐麓山之春雲。屈賈文章兩千古。鳳凰投荒鍛其羽。離騷惜誓作是間。想見行吟心獨苦。莽蒼何處寄精靈。但餘水綠山常青。詞人搔首來憑弔。遺恨于今尙不平。我生足跡半天下。南行未到蒼梧野。時有湘靈入夢思。還歌楚些爲陶寫。讓君衡嶽着先鞭。峴嶺高峯湧眼前。不應賦鵬傷遲暮。似聞迴雁感華年。撩人更有斑斑竹。淚點珠圓如可掬。伐爲筇杖倚吟身。扶携踏遍瀟湘曲。瀟湘景物秋最宜。蒹葭蒼白好吟詩。遙知驅起魚龍夜。正是聽酣風雨時。

秋日野望

舞風枯草遠吹香。惆悵青郊乍變黃。瑟瑟樹稍飄晚葉。深深谷底積朝霜。秋聲易惹秋人感。野獲頻催野老忙。楓蓼極天惟鴈影。一行南下向衡陽。

重九日山居值雨

登高勝日值陰霾。浙瀝茆簷漏滴階。山有林泉因覺逸。節無風雨不能佳。彤雲漠漠將沉壑。黃葉蕭蕭故撲懷。免却催租緣地僻。題糕興致未應乖。

文丞相祠

正氣常新廟貌殘。登堂瞻拜肅衣冠。丹心自足懸千古。赤手曾經犯萬難。柴市血飛天爲暗。匡山魂到水添寒。憑公鑄出忠臣鏡。留與今人史裏看。

金陵途次口占

眼底江南路。條條彎復彎。鶯啼三月暮。花落一春閒。曖曖烟中樹。青青郭外

山。只愁芳草綠。催上鬢毛斑。

飲妓院中有作

每愛揚州夢。時爲北里遊。歌聲穿綠樹。笑語撼紅樓。酒罷歡仍續。更殘樂未休。黃金嗟有限。無力擲纏頭。

夜宴

樂止嫌歌短。筵開愛漏長。金罇邀落月。玉臂接飛觴。對酒三分醉。聞花十日香。如何城不夜。欠却合歡床。

良夜

千金良夜漏遲遲。聽撥琵琶唱竹枝。不爲酒香人已醉。月明花影上身時。

秦淮河

蟬聲咽斷夾隄槐。畫舫排成水上街。踏遍有名金粉地。可無詩句壓秦淮。

江干口占

草長江南萬丈深。煙波闊處有翔禽。東風吹綠芳洲樹。爲引詩人到此吟。

即目

身在巖泉樹石間。詩心畫意兩閑閑。春朝雨後多奇態。疊疊寒雲疊疊山。

二月

二月江南草似茵。茜衫羅襪惹香塵。鶯聲只合佳人聽。一樣嬌喉喚軟春。

揚州瘦西湖

新晴着樹鬧暄妍。夾岸桃花雨過天。二八吳孃春紵曲。碧流如玉盪珠船。

鶯

劇憐孤枕聽春聲。何處閒吹葉底笙。人自惜花儂惜鳥。欲煩楊柳護鶯情。

絕句三首

觀雲在高峯。觀日在大海。吾生縱有涯。眼界足千載。
道心隨處是。妙在無可說。山脚有清泉。山頭有明月。
野鳥多異彩。山花多奇姿。高人多妙心。日夕相與期。

贈鼎青

廿年不見朱公子。海外歸來雪滿髭。同是風塵爲客日。喜逢盃酒話兒時。故人
肝膽千金重。俠士心腸一劍知。恨我浮生事飄泊。與君握手又分離。

答定礎

斗室能窺天地寬。三冬有酒不知寒。少時誤信出頭易。老日方嗟立脚難。逢驛

喜聞君寄語。寓書勤勸我加餐。故人馨德飄遠。千里傳來氣似蘭。

聽雨

搖壁高懸短短檠。五更孤夢帶涼醒。一團神韻歸天籟。臥聽空山夜雨聲。

白頭吟

落花還有再開時。頭白不復生青絲。小樓一夜風雨惡。伏枕但愁園花落。此老心中只有花。曷不持鏡覽鬢華。渥丹顏色變枯槁。少壯幾時便衰老。星星短髮不勝簪。搔首看花却自慚。年年春至花常在。年年漸覺容光改。但恨天公心太偏。東風獨爲吹花妍。殘紅零落有人惜。白頭老去無人憐。

春日東子威

梨白桃紅爛熳開。綠楊隨處見樓臺。半灣水色侵書幌。十里嵐光落酒盃。佳日

不妨添雅興。芳春端爲練詩才。遙知得句神來後。擲筆長空嘯一回。

海甸廢園

池館榛蕪任客遊。蕭森如我慣經秋。王孫歸去餘芳草。燕子分飛剩故樓。但看
土花防染淚。莫攀牆柳易牽愁。碧溝曲曲穿垣過。題葉無詩水自流。

入山

入山勿厭深。山深愈幽絕。人跡罕到處。妙境忽軒豁。飛瀑墮懸崖。觸石濺珠
沫。瀑怒不可近。珠冷不可撥。萬木爭莽蒼。萬峯爭削拔。欲把青芙蓉。力將
白雲割。峯頭掛夕陽。雲開見一抹。

百感

百感朝來似水生。更添芳草碧無情。滄桑突兀奇多變。世路崎嶇劇不平。自悔

蹉跎驚歲晚。因悲搖落賦秋聲。昂昂眉宇何曾減。留得當年罵座名。

返山居

三徑蕭蕭半就荒。主人去後日偏長。風霜剝瘦千竿竹。歲月催殘一草堂。句爲神來因入妙。心於靜處自聞香。故侯灌種懷深意。閑向瓜畦趁晚涼。

詠所畜驢

羊腸山徑盤崎嶇。日日尋幽我騎驢。穿林渡澗捷於馬。四蹄得得好馳驅。人言詩思在驢背。雨雪飄飄板橋外。酒香已熟梅正開。衝寒高士倒騎來。家逍遙有倒騎驢詩句。此時此景兩幽絕。佳句湧如花初胎。主人覓句心良苦。偶然得之喜欲舞。驢兮驢兮爾何知。得句在爾背上時。相爾之面本難封。相爾之背將毋同。幸免壓薪腰欲折。清閒馱得一詩翁。

李青萃王蔭辰召餐圓明園故址並觀魚

人生每被浮華誤。苑臺轉眼成邱墓。鼠肝蟲臂安足云。高人別有會心處。春光已老花仍繁。遊魚出沒濠梁間。觀魚賞花亦足樂。况復絜榼爲朝餐。李侯殷懃傳壺觴。王郎慷慨傾酒漿。風吹飯香落草際。野食方知野趣長。世間原無屠龍手。古來豪士多屠狗。今日且饒狗與龍。快把鮮魚來下酒。有客有客理釣絲。機心乍動魚先知。客不知我我弗怪。我却知魚客奚疑。浮生但求適意耳。虎符象笏能幾時。君不見名園遺砌竄蒼鼠。照眼荒涼但黍離。

西峯嶺

春山沒遮闌。任人恣遊賞。地僻足音稀。而我成獨往。羣峯若怒筍。穿雲露真相。雲欲壓峯低。峯欲向天仰。巖際野果妍。澗底清泉響。蛇籐掛林稍。羊石

臥榛莽。一邱一壑間。足引出塵想。山鳥時一鳴。山花爲一放。百盤路折曲。不辨東西向。少憇青松下。復登白雲上。眼底放奇觀。青青萬疊嶂。

中秋後二夕偕友賞月壽安山

月下看山山倍青。山上看月月倍明。不妨再展中秋夜。與客登山踏月行。斯時月色涼於水。倒瀉銀河洗千里。山靈睡眠照人醒。泉流涓涓石齒齒。一客倚樹發高歌。一客揮絃相與和。叶平聲餘音飛繞萬峯頂。回風裊裊吹女蘿。歌罷開樽共清酌。對月更添盃酒樂。小飲防招木魅饑。微醉不知松子落。酒香人語滿山隈。興酣一舉累百盃。時聞獨鶴掠空過。驚起羣梟出穴來。我性愛山復愛月。山有陰晴月圓缺。今夕山明月朗時。一年幸得逢雙絕。舉酒邀月喚不鷹。舉酒酌山填難平。主客相看各酩酊。夢回錯愕見晨星。

憤世

憤世拂衣去。塊然處空谷。四顧寂無人。風雨伴歌哭。哭亦不可哭。歌亦不可歌。歲月如流駛。意氣爲消磨。當我入山時。黑髮堪爬梳。面壁未十載。其奈星星何。此髮安足道。此心終未老。男兒生世間。立功苦不早。會當乘風雲。一展我懷抱。懷抱悵無盡。風雲來何時。豺虎作人語。鱗鳳徒傷悲。何如泉石裏。長嘯從安期。秋聽草蟲鳴。春對山花垂。蒼生久旱槁。安用霖雨爲。

獨往

幽人愛獨往。拾石煮爲餐。高蹤不可即。常在巖穴間。身倚樹中樹。目窮山外山。妙心寄何許。白雲時往還。

書生

書生自慰藉。沾沾身後名。此名果何物。乃爾惜惺惺。抵掌談不朽。豪氣相縱橫。千秋復萬代。代代長芳馨。神龍誇片爪。祥鳳矜脩翎。子雲謝華廕。獨草太玄經。一字值千金。糟粕亦精英。惜哉無人問。僅以覆醬瓶。

柬仲策

幾見奇花日日開。黃金散盡賸空臺。眼中歲月如流水。世上功名總冷灰。遣興最宜春夜酒。寄懷常在雪時梅。駐顏有術惟長醉。不醉防招白髮催。

秋日即事有感

掉破煙波一釣篷。半江蘆荻半江楓。秋山雨後堆寒翠。霜葉風前曳醉紅。已分生涯同斷梗。那堪心事逐飄蓬。季鷹豈爲蓴鱸美。真意偏藏不語中。

野興

行藥晨先出。尋詩暮不歸。入秋山氣爽。傍晚鳥聲稀。疏雨穿林過。寒雲貼水飛。江空人不到。一片荻蘆肥。

中夜爲風雨驚醒

老屋渾如坐小舟。濛濛雲水泛中流。半窗狂雨疑翻海。一枕驚濤欲報秋。鄉夢不曾離薄簟。詩心端合貯危樓。然燈起讀丘明傳。注耳滂沱迄未休。

高粱橋

頗有曲江趣。遊人雜遝間。青山笑白髮。綠水妒紅顏。小立觀垂釣。微吟愛倚欄。夕陽在高樹。招得鳥歸還。

重九日仲策約高會於圓明園因事未赴

圓明燔後餘土堞。重九登之冀消禍。主人召客觴園中。即席催詩如催課。朔北

秋高風雨稀。菊花初放蟹初肥。我願持螯來一醉。追隨裙幄賦新詩。登高縱幸
逢佳日。萬斛俗塵洗不得。有約錯過黃花黃。無福難消白酒白。諸公樂事料常
新。遍插茱萸少一人。古句。題糕不見劉賓客。落帽相看孟參軍。身雖未到神獨
往。滿園風景寄遐想。野雀羣飛繞菰蘆。石獸無言臥榛莽。登臨弔古各有情。
林間蕭瑟逗秋聲。高詠每驚佳句出。痛飲莫拒深盃傾。人生行樂聊復爾。眼前
種種東流水。安得明年此日時。重整吟鞭故園裏。我當爲主君爲賓。席地壺觴
照樣陳。只須再度丹楓色。更照酡顏兩醉人。

感懷

古松風入散清音。落日空山橫一琴。偶得意時隨雅奏。獨無人處自狂吟。流鶯
未了三春夢。老驥猶存萬里心。桃李滿城爭頃刻。那知秋後有霜林。

年來世味真如蠟。欲洗愁腸只有詩。半角青山朝雨潤。一簾涼月晚風微。平生浪抱拳雲志。今日翻興蹈海思。堪笑東坡長竄謫。肚皮原不合時宜。

戰場

到底輸贏兩是空。健兒十萬化沙蟲。野花最是無情物。戰骨堆頭分外紅。

對景

對景動吟興。晨曦薄欲收。黃鶯驚曉夢。紅雨洗春愁。草色遠橫岸。湖光澹上樓。眼前幽趣足。底事更尋幽。

春日偶成

人老春非老。尋春老不遲。好花紅上頰。芳草綠沾衣。行樂獨乘興。狂吟自笑癡。莫看懷裏鏡。免見鬢邊絲。

行吟

晚歲真忘世。惟耽五七言。秋蘭哀楚客。芳草憶王孫。別有縈懷感。從無逆耳喧。行吟縱憔悴。留得此心存。

月下口占

寂寂秋階露氣清。愁人看月倍分明。月若有知應自悔。悔照人間萬種情。

山中夜起

五更夜色倍空濛。鶴淚清于遠寺鐘。我欲登高嘯山月。不防月在最高峯。

偶詠

一江楓樹三秋半。十里桃林二月初。春意在花秋意葉。獨于紅處見工夫。

感興

浮沉滄海覺身輕。歲月催人怕計程。髮不白時誰惜黑。葉于黃後却思青。歸林倦鳥還相語。過樹殘蟬偶一鳴。悵悵西風歎搖落。江潭寥栗布秋聲。

秋夕

一屋圍松影。長吟抱膝中。秋涼閑臥月。夜寂悄聞蛩。碧落遠無極。銀河隔幾重。晚來丹桂發。香氣撲簾櫳。

漫述

不學楊雄作解嘲。嘔心空爾著書勞。長遊冥漠無人妒。獨立蒼茫只自豪。文意與山爭突兀。詩情同月向清高。興來提筆傾胸臆。草際寒蟲聊一號。

好鳥

好鳥高枝立。當頭睥睨人。催花無點力。占却十分春。

招歌者共酌

薄盞因花洗。斜扉傍竹開。莫將魚婢去。還有酒人來。不飲無奇夜。能歌即俊才。借君三歎妙。盪我寸心哀。

江干即景

亂山無數枕江流。江外平沙沙外洲。水面風微波不起。斜陽一角抹孤舟。

秋吟

霜重鴈聲沉。悲秋秋已深。寒風吹落葉。冷雨滴疏林。芳草來春意。孤桐此日心。江潭正蕭瑟。有客獨高吟。

宿大覺寺

不住泉聲繞枕涼。爲貪幽寂宿禪房。夢中欲得清詩句。移榻先挨向月窗。

甲戌重九後二日五十二初度

今日忽驚融過二。喜無霜雪犯青絲。思量盡不關身事。過去真如入夢時。酒買
十千聊拌醉。菊追重九未嫌遲。茱萸補插扶身健。對客長吟白傅詩。香山二月五日
花下詩云。二

月五日花如雪。五十二人頭似霜。聞
有酒時須笑樂。不關身事莫思量。

一艇

一艇穿蘋過。沙鷗拍浪飛。江楓殘照迥。山寺遠鐘微。每有橫流歎。時興出世
思。滄洲無限闊。容我揀漁磯。

秋日感舊

風吹蘆荻響清江。惹起新愁萬縷長。秋入尙餘春日夢。老來不減少年狂。烏啼
落月吳宮冷。雁怯繁霜漢苑荒。襟上酒痕須護惜。只今留得是衣香。

江干散步

潮退沙洲出。臨流試拄筇。歸鴉喧晚照。衰鬢怯秋風。一水白蘋外。四山黃葉中。行吟望不極。天末湧孤篷。

漁翁

十里停橈古渡頭。晚歸還自唱漁謳。蕭蕭蘆荻含秋意。澹月橫江一釣舟。

題孫子鈞黃冠道服圖

朗徹雲間海鶴姿。黃冠道服在山宜。當年別有傷心事。獨立蒼茫只自知。

遲月

遲月如遲客。徘徊獨倚樓。夜涼何處雨。木落一山秋。聞籟不成寐。開簾爲放愁。興來哦五字。清思上心頭。

舊宅

經年冷落舊朱門。閒坐龍鍾一老闈。無復畫梁棲燕子。只餘茅柵飼鷄孫。春風
春雨連生恨。桃葉桃根易斷魂。芳徑就荒人蹟少。數株禿柳送斜曛。

元旦

元旦年年兩度過。新歷舊歷。一般歲月易消磨。冷腸向熱偏難減。愁緒逢春分外多。
且薦辛盤隨俗例。還傾柏酒侑清歌。老來萬事都蕭瑟。幸得衰顏幾日酡。

園居

一畝園居半就荒。幾竿修竹午生涼。小池水縵魚吹浪。曲徑花開蝶舞香。得句
恍如神有助。閉門渾與世相忘。繁華轉眼隨消歇。那及幽棲日月長。

自歎

晚臥滄江念未灰。自梳華髮歎千回。奇書老眼觀彌切。寶劍雄心結不開。逕爾
蝸居歌日夜。無端蜃海起樓臺。蕭條事業休看鏡。蓋盡平生一酒杯。

無題

昔時曾見生祈死。今日真成坐待亡。未到覆巢欣有卵。豈知歸燕恐無梁。魯連
蹈海同悲憤。屈子沉沙過慘傷。人事不臧天亦醉。孤山一我百思量。

聞琴

杳杳廣陵散。如聞鸞鶴吟。迴風拂疏柱。零雨滴孤琴。爲曉曲中意。因知絃外
音。何人抱高潔。秋水寄遐心。

酒不到

酒不到劉伶墳上土。君莫信。李賀語。試看清明上冢時。野祭招魂奠玉醕。千

鍾萬鍾地上澆。但澆不到地下劉伶肚。

咏柳

翠鎖輕烟淡欲消。流鶯啼處有春條。風前一樣垂垂柳。傍得宮牆倍愛搖。

紅塵

臣朔饑驅索米忙。無端惹得髮蒼蒼。京華十丈紅塵軟。撲上襟頭覺不香。

春陰

十日春陰不肯晴。衝寒啼怯杜鵑聲。柳條搖曳新舒綠。草色希微遠泛青。深谷斷冰疑石裂。隔江聞雨誤潮生。幾時盼到東風軟。爲想看花眼放明。

初春

萬綠寂無語。春光柳占先。容驚今日老。花想去年妍。蝶夢酣如醉。鶯聲滑欲

圓。一朝金谷富。鋪地滿榆錢。

感事

一片喧騰搶攘聲。各憑朝報造輿情。董狐未易修今史。公是公非兩不明。

春起

睡起雲鬟掠一回。纖纖素手綺窗開。風吹柳絮顛狂甚。闖入粧樓貼鏡臺。

乙亥端午作

憶昔少時觀競渡。河上龍舟不知數。一聲傳令爆竹鳴。鼓槳齊飛孽浪去。爭看阿誰奪錦標。萬頭攢動萬足翹。健兒各顯好身手。使船如箭穿寒潮。靈均此日沉湘渚。楚人哀弔投角黍。欲憑片舸拯孤忠。烟水茫茫何處逢。魂招不歸空惋惜。年年追悼存遺風。如何恨事翻成樂。士女雲遊雜歡謔。古意由來易失真。

每忘本義舞虛文。時和歲豐亦足喜。共借良辰嬉水濱。今年端節知何似。滔滔流有江頭水。廿載干戈苦戰爭。龍舟不來壯士死。只見家家掛艾蒲。年時勝事今已無。眼前疾苦堪相弔。誰暇追懷屈大夫。

壽心畬叔明母

不作諛辭強譽君。爲兒能孝本天倫。怡怡菽水承歡日。靄靄萱堂泛暖春。賢母一心惟教子。壽星兩脚自知門。奉觴拜祝稱潛德。還念人人各有親。

題吳子玉將軍懸崖勒馬圖

畫中有神世所稀。畫中有意更入微。此神喜得畫師寫。此意獨爲將軍知。危崖壁立削千尺。下有深淵深莫測。將軍怒馬勒崖巔。鬚眉畢張神奕奕。將軍之馬馬中龍。曾經百戰沙場中。背不離鞍過嚴夜。蹄常踏血嘶腥風。騏驎由來能事

主。日効馳驅越艱阻。更喜主人能識天。潔身遠引何飄然。此中具有深深意。
神龍見首不見尾。嗚呼、二十年來苦戰爭。狐鳴狗盜徒縱橫。紛紛滾落懸崖下。
粉骨碎尸乃休罷。問誰得似將軍者。崖上安然猶立馬。

有詠

老樹數百年。閱歷知多少。長挺婆婆姿。無語寂悄悄。螻蛄爾何物。飛來集其
秒。春秋且不知。鳴聲獨喧擾。
書生好大言。澄清在攬轡。謀身一何艱。謀國又何易。懷才不得試。激昂自拊
髀。起視冷釜中。空空已無米。
虎倂影憧憧。爲虎作前驅。倂意在求代。問彼意何如。彼意在得錢。不惜賣賤
軀。羅跪聽驅遣。猛虎正負隅。

小民盜一鈎。眈眈值幾何。捉將官裏去。誅罰嚴而苛。盜陵及盜宮。孰與盜鈎多。或封恩澤侯。或營安樂窩。

讀項羽紀

古人骨已朽。存者惟文章。不有史遷筆。孰知慕項王。一夜垓下歌。百世猶激昂。虞兮本知己。劍氣白如霜。豈料數十載。復遇一子長。發奮爲作紀。奕奕神飛揚。我讀未終篇。悲歌慨以慷。霸王與腐史。兩兩立我旁。一拔劍叱咤。一秉筆旁皇。嗟哉時不利。中心多慘傷。同是失意人。相得固益彰。借爾英雄淚。洗我抑塞腸。一紀足千古。風雨吐光芒。

刻意

年來刻意強爲歡。長劍原知出匣難。對酒不妨三日醉。著書幸得半生閒。乍逢

奇士先心折。每到名山便笑看。乘興愛尋詩裏趣。一傾懷抱向騷壇。

秋詠

搖落多秋思。孤懷百不禁。明沙橫鴈影。積葉漏蟲吟。菊有清幽韻。雲忘舒卷心。眼中寥廓甚。詩意在疏林。

書懷

曾御長風萬里遊。如今眞箇死前休。霜催猿鶴聞清淚。日落關山起暮愁。廿載轆轤心上轉。百年碁局眼中收。少時情事那堪憶。重整鞭絲恐白頭。

芳郊

出郭市囂絕。芳郊無俗塵。雨餘花更韻。春淺漲仍新。山色如招我。風光欲醉人。垂垂道旁柳。拂面意相親。

早春

人有冬眠態。陽生夢乍回。好風吹柳起。微雨送春來。冷蝶一雙舞。野花三兩開。去年遊屐在。似怨委塵埃。

東風

東風着力爲吹香。吹得遊蜂爾許狂。桃杏鬥紅梨鬥白。滿園春色一頭霜。

學道

萬籟爭喧道力微。試從魚鳥學忘機。十年面壁知容易。難得一心無是非。

自贈

何處山中客。峨峨處士冠。雄談生舌底。豪氣見眉間。蕭散得天趣。低徊懷古歡。高吟安所用。空自霸詩壇。

太璞完吾素。平生不折腰。寒梅長漠漠。獨鶴自脩脩。筆健驅風雨。絃哀捲海潮。寸莖滿山上。沉屈有高條。

泉石

泉石生空山。同性不同格。山泉自涓涓。山石自兀兀。幽人尋幽來。對此笑顏開。一快平生願。枕嗽日千回。一自幽人至。遂乖泉石意。洪荒太古時。泉石本無事。不知幾春秋。山空萬象幽。兀兀石自立。涓涓泉自流。

郊行

東風軟得柳絲絲。處處花香鳥語時。春色十分人易醉。天生濃釀沃新詩。

春思

新葩初放難禁雨。嫩柳輕拖不護隄。誤上翠樓情脈脈。驚看碧草色萋萋。

觀物

欲飛水勢千重浪。如削山形萬丈峯。月到中秋彌覺白。花無四季總能紅。偶觀物態都成趣。百鍊詩篇尙未工。巢父一生惟洗耳。幾人得與此心同。

儒冠

迂中有趣一儒冠。坐擁書城亦大觀。下筆春雲生變態。行文秋水起重瀾。飄飄逸興隨遊屐。落落孤懷寄釣竿。慢說身閒清福在。忍貧容易樂貧難。

秋日雜詠

九月林間疏葉瘦。三秋天末片雲孤。橋西村釀家家好。入問朝來有膾無。石徑樵歸向晚時。林稍雨過斷雲稀。滿山黃葉秋將老。幾箇寒蟬抱冷枝。落葉飄飄悄打頭。一聲長嘯四山秋。愁人強欲留明月。明月沉西獨倚樓。

漁家傲

秋江遠水浮空碧。游魚抱卵藏菰荻。夕陽倒掛枯樹梢。晚霞飛印波心赤。江干
漁舍起炊烟。老漁牽纜繫釣船。賣罷魚歸買尊酒。獨酌船頭爛醉眠。殘膏易盡
篝燈滅。欲墮不墮半江月。一聲款乃夢中呼。釣得銀鱗白于雪。

幽居

巢父安巢處。雲開偶一逢。竹窗涼午夢。苔徑濕吟蹤。逸思隨流水。高懷在遠
峯。年來甘澹泊。不記錦春穠。

答客問

問我秋懷抱。渾如落葉深。浮雲無盡意。流水有清音。對菊得佳趣。登樓生遠
心。隄邊百年木。從不擇棲禽。

月夜不寐

譙樓歷歷拆聲催。長夜無眠倦眼開。明月似憐孤枕冷。低穿簾幙上床來。

偶然作

造化文章在。隨遇即吾師。詩心自千古。山色宜四時。花香誰不賞。魚樂我能知。滾滾江流濶。幽幽巖石奇。龍蛇長混混。禽鳥自依依。獨立諸峯頂。天高雲脚垂。

閉門

百雉重城夜戒嚴。閉門惟有睡厭厭。處堂燕雀心原苦。一枕能安便算甜。老來雙眼倍分明。閱慣滄桑兀不驚。江海倒流陵谷碎。書生空自擁書城。

挽車行

少年出門覓食去。膂力雖強無用處。低首街頭挽做車。身爲牛馬爾何愚。終朝博得一甌粥。辛苦歸來聊果腹。家中老母六十餘。兩口分食苦不足。東鄰有婦生兩兒。大兒落草黑山寨。二兒剪徑黃土陂。暗向慈親遺贓私。釜充美食笥美衣。嗚呼、亂世不分勤與惰。黠者飽餐馴者餓。慎毋賤視挽車人。循循安分皆良民。不羣虎羣羣羊羣。

感興

霜枝原不待春溫。自有衝寒傲骨存。駭浪爭飛孤艇險。亂山環拱一峰尊。憂時空挾匡時策。問世翻無入世門。從古讒人多用事。茫茫天道總難論。

丙子歲移居椿樹胡同成壽寺地近鬧市屋僅兩椽

萬丈塵中屋兩間。無花無竹自蕭閑。幽人隨地堪棲隱。豈有巢由等買山。

丙子重九

催租吏亦饒風趣。助得詩人妙句傳。我值重陽動吟興。了無剝啄到門喧。
鴈聲啼破一林霜。陣陣山風落帽狂。菊酒茱萸渾不算。登高纔信過重陽。

津門

津門烟樹望中迷。百里無山眼界低。秋水夕陽閒泛艇。蘆花如雪撲沙隄。

感秋

歲歲逢秋便愴神。九天寥廓一吟身。啼螿似向騷人語。過鴈偏招旅客聞。何處
寒江不瑟瑟。此間落葉倍紛紛。登樓覽景差能賦。極目長空但白雲。
西風搖落苑臺荒。白袷衣輕怯晚涼。都爲有才撐傲骨。不知何計洗愁腸。疏林
一片秋多雨。澹月三更夜欲霜。自去揚州無好夢。蛩聲啼斷夜偏長。

爲人書聯得詩清兩句因足成之

蘆荻蕭疏萬頃濤。一江秋色染漁舸。詩清都爲茶香足。花好能令酒興豪。逸思飄飄驢背遠。孤懷皎皎月輪高。醉中欲看囊中劍。又恐霜華襲鬢毛。

山中聽客彈琴

山中無俗客。高士抱琴來。對我奏一曲。泠然心爲開。清泉流不住。獨鶴去仍回。彈到忘絃候。春花秋欲胎。

舞女

掌上珠輕夜有光。生來端合舞霓裳。美人遠看千般媚。近處聞花覺減香。

秋日晚望

長林風定覺秋清。鴉背馱歸晚照明。紅葉映顏如中酒。無人不到醉翁亭。

余學書未成而索者紛至大有應接不暇之勢偶誦前人早起開門七件事柴米油

鹽醬醋茶之句因爲小詩

秃筆忙耕紙上烟。不知成熟在何年。閉門一件關心事。書債多於柴米鹽。

惜髮

曉梳惜髮脫。檢點未忍棄。所惜豈在髮。歲月水流逝。逝流不復返。脫髮不可收。數莖別華顛。百感上心頭。及時不努力。吾生行矣休。

看花

看花長日倚闌干。借取嬌姿破老顏。蝶自戀香香戀蝶。滿階紅雨易春殘。

秋江

紅蓼秋深兩岸平。水流沙淺悄無聲。失羣孤鴈背人過。隻影橫江時一鳴。

小飲舟中聞笛

蓼岸推篷飲。漁燈欲上時。笛中常有月。酒外更無詩。入夜聞三弄。臨流醉一卮。醪香兼竹韻。魚鳥不驚疑。

郊雨

細雨竹林響。瀟瀟韻滿樓。城中仍溽暑。野外已清秋。涼到老松骨。幽通古渡頭。晚晴新漲綠。蘆荻扁舟。

小隱

小隱渾忘世。幽棲自養真。桑槐三畝宅。風月一詩人。野坐滑黃石。山行蹂白雲。不時吟興動。得句偶清新。

送別

十里城西舊板橋。秋風瑟瑟馬蕭蕭。行人一去不回顧。短短長長剩柳條。

登香山

山如相識倍相親。小坐須臾石吐雲。白袷衣單詩骨冷。團團輕絮擁吟身。

遣懷

欲遣霜懷強覓懽。朔風蠻雨不勝寒。天心未許從頭問。國事寧禁歛手看。一曲狂歌披醉膽。半尊濁酒洗愁顏。過河齊作枯魚泣。河自長流淚自乾。

西風

西風吹鬢欲成絲。正是蕭蕭落木時。半港白蘋宜放艇。滿江紅葉好題詩。無端鄉思因鱸動。不盡秋心有鴈知。萬斛新愁何處遣。日看叢菊倚東籬。

秋訊

到處傳秋訊。征鴻背上霜。寒砧敲旅夢。濁酒漉詩腸。月冷蘆花白。風高木葉黃。聲聲訴幽怨。階砌一啼螿。

贈孝可

浪走川湘健在身。衣衫狼藉濕征塵。胸中合貯奇山水。揀取精華語故人。短髮蕭疏不耐搔。朝來對鏡見斑毛。風霜吹撼渾無力。豪氣依然百尺高。

秋郊

綠葉無多晚照微。郊行覽景爲尋詩。蕭蕭疏柳含秋意。思逐征鴻背上飛。

長吟

時危自覺歡情少。老去因思學放翁。萬斛愁消盃酒裏。一生心在卷詩中。更誰槽檻知奔驥。無復茅廬願臥龍。留得閒身向幽獨。亂山深處寄吟蹤。

日觀峯

曉風吹我上山行。脚底雲流石有聲。絕頂目窮千里遠。危崖身覺一毛輕。天鷄喜傍日邊唱。海鶴時來巖際鳴。封禪久荒遺蹟冷。齊烟九點自青青。

鐵公祠

寸心丹到後人知。入廟如過墮淚碑。靖難功臣誰記得。千秋惟拜鐵公祠。

歷下亭

歷下亭連魯直祠。亭中名士舊題詩。秋風吹瘦明湖柳。又是漁洋索句時。

冒雨遊勞山得四絕句

一峯更比一峯奇。剔盡蒼崖處士詩。雨色沉沉山欲睡。我來惟有野僧知。雨後飛湍響急灘。老松吐翠石吞寒。白雲一抹三千尺。不放青山與客看。

面面雲巒景不同。居然身入畫圖中。斷厓陡絕無人到。倒挂松枝欲化龍。不斷泉聲答海聲。御風行去也泠泠。天鷄鼓翼峯頭唱。多少魚龍側耳聽。

金陵懷古

嗚咽秦淮水不波。一河遺恨六朝多。青山無語看今古。滾滾興亡眼底過。人物風流紙上傳。建康建業總成烟。山川空自蟠龍虎。王氣消沉五百年。

清涼山掃葉樓

樓無一葉奚須掃。短短衣襟滿俗塵。但願清涼山上住。清風涼月證前因。

燕子磯

王謝堂空剩夕暉。斷梁無復落春泥。年年未逐潮飛去。獨有江邊燕子磯。

莫愁湖

敗荷枯梗斂餘芬。水面微波縐縠紋。最是一湖風月好。美人名將兩平分。
城西人說勝棋樓。四面風光眼底收。我欲振衣觀海去。小湖容不許多愁。

太湖鼉頭渚

鼉頭吞吐鴨頭波。一渚春光柳占多。烟水至今猶浩淼。樓臺如舊總嵯峨。湖心
不浪魚從躍。渡口無人鳥自歌。縹緲峯高雲外立。盈眸點點墮青螺。

北固山

江山如畫幾時描。太息孫吳霸業銷。犄角長流天塹固。海門兩點湧金焦。

鶴林寺

入寺微聞梵唄聲。一叢梅竹雨冥冥。野僧念佛無鐘磬。獨鶴空山淚倍清。

史公墓

梅花嶺畔哭忠魂。半壁河山寄此身。南渡可憐輸一戰。北征無計統三軍。昭昭大節垂青史。暗暗寒香護冷墳。十日揚州餘痛在。不堪憑弔淚沾巾。

平山堂

庭院深深別有堂。歐公遺像畫圖裝。榭空舊籍難稽古。砌挺孤梅獨泛香。曾倚闌干長嘯傲。足銘金石大文章。醉翁醉去無來者。寂寞蒼碑傲夕陽。

即席賦示

上海作

當筵豪竹雜哀絲。十載揚州夢覺遲。一事語君須記取。美人最好酒闌時。

岳王墳

廟貌堂堂此地尋。紫雲長護氣蕭森。如銅如石精忠柏。表出將軍一片心。一團正氣感羅裙。油碧車流十里芬。兒女亦知忠憤事。香花來獻岳王墳。

蘇小小墓

西泠蘇小弔遺墳。香骨長埋土亦芬。半截碑題名士淚。一泓潭影美人魂。湖心有月不愁夜。橋畔無花枉惜春。弱柳愛眠呼懶起。流鶯到處印啼痕。

登六和塔頂觀錢塘江

我到錢塘不遇潮。六和塔頂一摩霄。當年建塔人何在。灑灑江流送畫橈。

雲棲寺

修竹猗猗十萬竿。綠生衣袂不勝寒。山靈偶發丹青興。畫與人間贊嘆看。

靈峯寺

獨上靈峯試探梅。一枝衝雪爲誰開。暗香浮處月初墮。招得孤山白鶴來。

林處士墓

昔年梅落猶餘鶴。今日梅開鶴已飛。寂寞孤山誰作伴。老妻仍在悵無兒。

放鶴亭

斷橋殘雪擁孤山。放鶴亭中客倚欄。歲歲梅花自開落。幾時去鶴倦飛還。

北高峰

四面嵐光一抹濃。臨湖對拱兩高峯。北峯似笑南峯懶。烟霧沉沉入睡中。

南高峯

千層石磴路紆迴。絕頂浮雲插不開。此景只應峯上覽。一江如帶一湖盃。

黃龍洞內供黃石公

素書傳後去無蹤。不料棲霞嶺上逢。古洞煉形多歲月。一朝黃石化爲龍。

于忠肅墓

如公大節足千春。功罪分明待後論。勝算當時能却敵。孤忠從古易沉冤。衣冠遺像瞻祠廟。篆刻豐碑立墓門。地下依然清似水。玉壺心事井中存。階下一井。名忠井。

葛嶺

葛翁何日逕冲虛。嶺上臺荒草未除。丹井藥爐人艷說。不知抱璞有遺書。

靈隱寺羅漢堂於丙子年爲火毀

羅漢名堂付火燒。金身五百不曾饒。祝融神力高于佛。一炬咸陽土亦焦。

西湖雜詩

七日遊湖七日晴。深冬隄岸尙浮青。老夫腰脚逢山健。贏得閒身比鳥輕。水色連天白似銀。斷橋孤棹送黃昏。一湖勝地都歸寺。風盪鐘聲處處聞。白隄踏過踏蘇隄。信步不知東復西。佳句兩公分占盡。滿湖空剩好詩題。

錦文仙鳥傍人飛。古寺鐘聲隔霧微。最愛雲棲山徑裏。萬竿修竹綠僧衣。
西子湖邊樓外樓。葦鱸風味座生秋。酒酣放膽題詩句。沒得青蓮在上頭。
攀開籬葛恣登探。說起看山眼便饒。古木有靈呵兩寺。六通樟樹理安楠。
一抹湖山爲我青。拌將詩句答君情。振衣直上峰頭嘯。虎跑雲飛石亦驚。
枕邊合眼見西湖。最是關懷算老夫。夜夜不曾離客夢。孤山明月一輪孤。

咏官梅

華旒不會忘淡泊。最憐廨舍一官梅。冷魂合在孤山外。獨抱幽香犯雪開。

三月

三月花時節。香紅易醉人。有山皆似錦。無樹不爭春。水面鳧遊媚。枝頭鳥語新。尋芳腰脚健。遮莫誤良辰。

惜春

落花無奈暗傷神。每到春殘倍惜春。十二闌干輪倚遍。蝶魂留處印香塵。
淚灑殘紅欲染衣。東風容易誤佳期。無端放却春歸去。悔不花開折一枝。

今昔

狼藉遊衫舊日塵。老年却憶少年春。盃流酒綠逢豪士。簾捲燈紅看美人。斫地
興歌多慷慨。遊山得句倍精神。如今閒裏求生活。冷熱端從倦眼分。

嘲某甲

先生年老愛風流。偷不得香死不休。繞頰須髯森似戟。却從花底覓溫柔。

悟道

暮年面壁習忘機。向日回天願已違。滄海化田田化海。沙鷗朝暮自飛飛。

春歸

空餘燕子識吟身。一度春歸一愴神。日暮凭闌倍惆悵。點苔紅雨落繽紛。

出郭

襟頭萬疊壓浮埃。爲挹清光出郭來。一陣野香輕撲鼻。田家籬落豆花開。

夏日偶詠

碁客不來庭院寂。獨消長晝挾書眠。莊生胡蝶飛何處。好夢如珠箇箇圓。

秋聲

澹月流無影。漁燈遠岸明。西風吹葉落。一葉一秋聲。

江頭

有限夕陽猶戀樹。無多霜葉欲辭枝。秋來惹得愁心疊。蘆荻江頭自詠詩。

初春

安排遊計試輕衫。逕爾尋幽上翠巖。二月天寒春尙淺。半溪水漲雨初酣。乍聞鶯囀神爲王。未到花開眼已饑。弱柳青搖雙槳路。一時江北似江南。

入世

入世眞如海樣深。魚兒隨浪自浮沉。少年抱有從戎志。晚景催生學佛心。馬到不騰羞戀棧。鳥飛將倦欲歸林。拂衣逕訪鍾期去。流水高山橫一琴。

即事

雨過園林一洗新。逕穿遊屐踏苔痕。青青柳色縈鶯夢。淡淡花香護蝶魂。叢綠漸濃將及夏。殘紅不落欲留春。種瓜豈爲謀生計。別有孤懷且莫論。

惆悵

臨去秋波一轉斜。含情無語上香車。蕭郎却悔遊春晚。惆悵風前折後花。

舞女篇

有女如花伴客舞。亭亭一棵搖錢樹。可憐身世似哀鴻。搖得錢來將自哺。貴游公子好繁華。黃金浪擲同泥沙。朝聞哀鴻聲。一錢不捨任咨嗟。夕聞嬌燕語。傾囊相贈何豪奢。歌樓子夜多嬌燕。豈知盡是哀鴻變。紅氍毹上舞翩翻。燈下美人分外妍。老夫霧眼見猶憐。何況公子正少年。

登樓

東風無力把春留。蛺蝶飛飛不肯休。滿地紅堆愁萬疊。落花時節一登樓。

感賦

泉清流濁不相宜。惹得旁人笑我癡。百詠詩歌生感慨。一談劍術動鬚眉。客中

長夜愁中過。醉後狂言醒後知。鳴鶴晚無棲宿處。野鴉豪占最高枝。

月夜宴燕市酒樓

召客爲高會。欣逢月上樓。笙歌聞徹夜。劍器舞生秋。濁酒難消渴。名花易解愁。今宵盃在手。不醉莫歸休。

梅花

月養精神雪養姿。孤山長與鶴爲期。仙人告我清新訣。飽看梅花後作詩。

訪道

到此惟聞凍雀喧。幾家茅舍不成村。道人高臥無童子。積雪皚皚爲閉門。

看春山

綠楊垂處鳥關關。日日遊春了不閑。一笑相逢無片語。青山看我我看山。

傷春

桃花笑罷剩春風。相映年年面不同。滿樹綠陰濃匝地。有人惆悵拾殘紅。
度度花開儘有期。對香不嚼汝誠癡。一從春事闌珊後。抱得空枝却怨誰。

空山

空山高隱向幽清。早起觀書眼倍明。獨有黃鸝慰岑寂。隔窓時送兩三聲。

郊外口占

柳色盈眸綠意新。春郊招我賞芳辰。衣襟積得塵三斗。遠郭青山笑煞人。

閒居

翰墨香多妙。琴書意自閒。知音在流水。閉戶即深山。犬吠荒村外。蟲鳴古壁間。茶餘惟索句。不覺晚鐘殘。

春日泛舟頤和園昆明湖

十里湖光一抹勻。扁舟來占上林春。柳條斜曳絲三丈。桃浪平添漲二分。彈鋏倦爲燕市客。扣舷思作武陵人。離宮深鎖笙歌歇。草色盈隄任意新。

遊西山遂至碧雲寺

出郭爲尋芳。行行到佛堂。花逢春日好。人憶少年狂。古寺自清寂。亂山長莽蒼。紀遊詩未就。不覺近斜陽。

買春

黃金不惜買青春。買得春來更惱人。最是枝頭香未了。風吹紅雨落紛紛。

嘯傲

嘯傲松三徑。盤桓屋兩間。幽懷端好靜。清福在能閒。落木添疏籟。浮雲補斷

山。會心原不遠。目送晚樵還。

夜起偶賦

枕上愁心疊。寒更聽倍真。可憐將墮月。還照不眠人。煮茗消殘夜。聞花憶遠春。眼中留鬢影。往事忍重論。

遣閒

竹籬茅舍任棲遲。長日惟哦一卷詩。老樹根深因石穩。清泉性冷在山宜。調逢寡和真成絕。語到驚人始算奇。待月溪頭松倚遍。露華濕袂不曾知。

秋光

霜岸看紅葉。如花一色新。黏天堪入畫。映水欲留痕。別思憐孤鴈。鄉心逐片雲。秋光無限好。莫遣近愁人。

山居

亂石插雲根。安巢在上層。居能幽若寺。頭不禿而僧。簷矮遮山色。簾疏漏月痕。蕭閑生野興。俛仰樂天真。

懷舊

詞客逢春亦感秋。花香敵不住牢愁。故交落葉蕭疏甚。結得新知却黑頭。

答友人來書問近狀

五十年來鬢未斑。經霜才覺老松頑。胸懷壯闊曾觀海。眼界空明合看山。薄酒難謀千日醉。奇書借遣一身閒。卷中別有真風味。不爲參禪也閉關。

春夜北海聞笛

柳條裊裊弄輕柔。太液池邊宿雨收。春脚最先探上苑。月痕每愛印層樓。何人

吹笛傳幽怨。有客凭闌感舊遊。夜鳥不啼松籟寂。壓雲清韻獨悠悠。

江南春

香泥帶絮污遊衫。過雨晴天照眼藍。夾岸桃花如舊識。一篙春水漲江南。

秋日口號

每愛秋風爲味蕪。朝來詩思在清罇。蘆花掩映白鋪岸。楓葉參差紅到門。

秋意

黃花時節鴈當頭。欲遣愁懷獨上樓。落葉滿山寒漠漠。一番風雨一番秋。

漁父

晚來侑酒足魚蝦。水上生涯艇是家。爛醉不知明日事。滿江月白宿蘆花。

秋夜不寐

搖搖青凝照深宵。自詠新詩破寂寥。薄夢不成孤枕冷。聲聲秋雨滴芭蕉。

秋夜獨酌

獨酌山亭上。一卷石作鄰。秋聲逗高樹。月影落清罇。有酒何愁夜。無花不憶春。醉歌聊自賞。幽意共誰論。

廬山

直上廬山頂。翻疑五嶽低。同遊惟野鹿。聞唱有天鷄。洞以雲爲幕。崖因石作梯。古松眠絕巘。煙霧萬年迷。

瀑布

疊石層層壓上頭。奔騰百丈壑中投。清泉自抱出山志。不畏前途有濁流。

香爐峯

屐聲鳥跡綠陰中。曲折不知路幾重。自是山僧饒眼福。白雲深處看青峯。

白鹿洞

講罷還騎白鹿遊。雲深深處獨尋幽。千巖樹色迎眸湧。百道泉聲襲耳流。洞裏四時長不夏。山中六月已先秋。晦翁去後餘松石。雨打風吹兀自留。

送仲譜

黯然送客暮江頭。紅蓼飄零水不秋。欲遣離情傾濁酒。拌將別夢逐孤舟。西風獵獵吹君去。夕照遲遲爲我留。拍岸急流飛似箭。一聲櫓響過汀洲。

夜起偶成

繚煙篆盡鴨爐香。陡覺清愁比夜長。遠寺鐘聲半牀夢。空階月影一簾霜。攤開黃卷如相識。看過青山便不忘。未到鷄鳴先起舞。着鞭毋待髮蒼蒼。

賦謝朱雲章難中分食

難中逢俠客。語語見情深。慷慨分存食。殷懃問捷音。恩難忘一飯。愧未報千金。暫果鰕生腹。長銘國士心。

戰後

頽垣斷井艸離離。楊柳摧殘絮不飛。冷落江村無犬吠。向陽惟見野鴉肥。

丁丑秋遷居天津租界

十里洋場卜我居。携來長物一囊書。胸中自有山林氣。近市何妨偶寄廬。逢人都道不如歸。垂翼雲鵬未得飛。却憶故園三徑好。菊花今度爲誰肥。

西沽

野景明雙目。荒村晚照時。臨流便舒嘯。覽勝爲尋詩。風勁鳥歸急。江空月上

遲。寄言高蹈者。此岸足漁磯。

暮春

不堪春事到闌珊。寂寂園亭悄倚欄。綠意漸多紅漸少。蝶蜂無賴轉愁閒。

寧園閒坐

閒坐看花落。芳園日影長。蜂鬚拖細蕊。鶯語鬧垂楊。偶爾得真趣。因之聞妙香。神來詩句好。再索已全忘。

花影

月光如水浸空庭。碧漢雲流似有聲。曲曲闌干香氣繞。玉人花影兩娉婷。

贈穆道人

別時授我駐顏方。爲道丹成日月長。十載重逢無一語。驚看鬚髮冒秋霜。余年五十六。

米行道人之方而須髮尙黑。
道人長余二歲而首皓然。

落花

花有香時蝶有魂。黃金買不住青春。無端花落春歸去。却怨東風慣誤人。

勸酒

有酒須同醉。胡爲爾獨醒。況逢春色爛。正對月華明。世事如長夜。人生若遠行。開尊惟痛飲。愁退一身輕。

李叔任索詩賦此奉贈

青蓮詩裔舊家聲。掉臂長爲萬里行。自是俠腸能結客。由來高詣易知名。雲烟破處奇峯出。風雨狂時快劍鳴。便向酒壇傾一斗。醉中豪語市人驚。

叔任不以豪士自居命再賦一首

寧園暇日行吟處。一笑相逢萬綠中。愧我探囊無妙句。羨君落筆有奇峯。叔任善畫。
開懷對酒月將滿。得意看花春正穠。更喜新詩時諷示。如聞蕭寺五更鐘。

年來

年來百事費思量。問世空懸肘後方。便向草茅偷視息。不煩龜策卜行藏。長吟
松下詩應健。小睡花中夢亦香。四顧無人堪一語。只憑濁酒洗愁腸。

層樓

撲面楊花二月天。畫梁燕語動人憐。春來只覺東風軟。愛上層樓正少年。

自嘲

十載揚州夢乍醒。眼中倩影尚亭亭。平生未作驚天事。只有青樓識姓名。

北戴河

欲挹清波洗此心。披襟風岸快登臨。一生目力宜觀海。萬頃濤聲並助吟。逐浪魚龍爭出沒。忘機鷗鷺自浮沉。却憐人說神山事。水闊天空何處尋。

西聯峯廟俗名觀音廟

古廟何年占嶺西。松杉凌亂白雲迷。道人習靜門長掩。花落閑庭一鳥啼。

夏夜獨坐

滿將懷抱向清幽。如雨蟲聲傍耳流。孤館納涼欣對月。四山鳴籟欲生秋。惜無紅袖同良夜。剩有青衫疊舊愁。感興拌從吟裏寄。眼前詩句不勝收。

聞蟬

幾樹蟬聲咽綠陰。倚闌有客共長吟。蟬吟終日無新意。不及詞人兩語深。

海濱感興

魚龍吹浪暖於春。借洗襟頭十斛塵。我欲乘槎浮海去。未成一事却收身。

海濱雜詩

十里長隄枕海潮。潮聲暮暮復朝朝。問君詩思添多少。細雨騎驢過板橋。
負暄沙岸久徘徊。如鏡波平眼底開。海到遠天相貼合。征帆何處破空來。
弄潮身手爾何如。沙礫堆中試摸珠。浴罷美人添秀色。居然海水出芙蕖。
御風邈迤入山行。樹在山中分外青。長夏喜留春一綫。野花盈壑不知名。

泛舟北海賞月

月色盈池好放船。玉盤飛落水中天。舟人一對無情槳。打碎清光不許圓。

拈花寺

城北禪堂舊有名。森森夏木漏鐘聲。我來學佛拈花笑。頑石心腸學不成。

竹雨

孤館抱書眠。夜涼不知暑。風吹修竹聲。碎作敲窗雨。

訪鼎甫於北京廨所不遇觀其院落閒靜益蓮作花竟忽爾舍去索米津門賦詩調之

庭陰閒却讀書床。孤負荷風送晚涼。見說先生最知味。芙蓉那及稻粱香。

深宵

深宵暑退覺身輕。欲借新詩寫遠情。獨上樓頭望明月。心脾沁到十分清。

感秋

詞客多情易感秋。繁霜時節使人愁。一從宋玉悲搖落。直到廬陵賦未休。

秋日村店小酌

紅葉如花好。逢秋亦當春。莫嫌村酒薄。能醉抱愁人。

水西莊

郊行逕過水西莊。疏不藏鴉柳兩行。斷砌微吟蟲有韻。寒塘半涸藕無香。一林楓葉紅於火。幾點蘆花白似霜。遺址盡教秋草占。晚烟斜日太荒涼。

秋夜獨坐

坐久因長詠。詩囊借貯愁。葉輕風覺勁。篁密月加幽。獨鶴臨清夜。寒蟾接遠秋。高懷如可寄。縹緲碧峰頭。

閒人

草間偷活一閒人。心裏從無得失分。玩月不嫌雲礙眼。澆花常誤水沾身。有時度嶺尋靈藥。隨意臨流釣素鱗。澹泊自甘能守拙。浩歌斗室詫生春。

山居偶作

短榻宜高臥。深山無俗塵。琴書融志趣。花草爽精神。院靜啼黃鳥。窗虛入白雲。晚來風月好。頗足寄吟身。

訪友

應客無童子。入門山鳥鳴。爐餘煎茗火。堂有讀書聲。樹色松奇古。花香蘭最清。論詩因坐久。落葉滿閒庭。

秋夜聽雨

案頭蠟淚看成堆。長夜無眠倦眼開。涼雨滿窗愁滿枕。秋聲陣陣上樓來。

戊寅重九日偕叔任鼎甫登高於寧園

芳園落木已千章。人自盤桓鳥自翔。滿地黃花拖影瘦。縱無風雨也重陽。

登高佳日約同遊。此地無山却有樓。君似孟嘉傳韻事。我如王粲動鄉愁。驚人
才調優爲賦。作客心懷易感秋。不見白衣來送酒。只將籬菊插盈頭。

觀書

抱膝觀書五十年。蠹魚字字食神仙。平生不耐人烟火。爲見書中別有天。

和尙

和尙敲鐘意態閑。世間萬事不相干。忽逢石破天驚日。震及蒲團入定難。

秋吟

滿地繁霜候。騷人澤畔吟。丹楓怡野望。黃葉老秋心。詩界江天濶。愁懷海水
深。浩歌惟自寫。無意待知音。

附記。三十一歲後詩。刊出五百七十五首。全集共載六百五十五首。

82

321645

321645